

# PABOJA ETEHUE'YO CONITOJO BA'E CUANA HUASIJJE EBIONEI 1 CORINTIOS

*Pabohua tehue canaje Jesusaja epeeji cuana Conitojo ba'e yasijje*

<sup>1</sup> Jesusaja epeeji cuana, eya Pabo, Jesosa Quitoja huoojea'yo ojaya esohui huohuijji. Jamaya Eyacuiñajjiya a sa acani. Jesusaja epeeji Sotene enijje nequi. <sup>2</sup> Eyaya tehueaña miqiana huasijje, Jesusaja epeeji cuana Conito cuiñajjijo ba'eca huasijje, ojjaña meshijo ba'eca huasijje pea'ai tehueaña. E'e, yahuajo Eyacuiñajjiya miqianaya ojjaña babaca canaje Jesusaja epeeji e'e jojo nei epo'yojji, quea pame nee. Jamajjeya miqianaya ojjaña cuana jama poani ba'a: —Jesosa, ¡e jaahuanajji pocue! —jamaya poani esejaya Emeshi Mese nei Jesosa Quito nijje, ojjaña esejaya Emeshi Mese nei nijje. <sup>3</sup> ¡Esejaya Emeshi Mese nei Jesosa Quitohua, Eyacuiñajjiya esejaya Chiya pea'ai miqianaya cajaanahua cahua, quea bei caba'e mee cahua pea'ai!

*Pabohua Eyacuiñajji bihuia canaje*

<sup>4</sup> Eya Eyacuiñajji nijje mimiani miqianajo quea huiso nee jama ba'a: —Eyacuiñajji, miya quea pame nee nee. Jesosa Quitoja epeeji ojjaña cuana jaahuanaña quea pame nee nee —eya poani.

<sup>5</sup> E'e epeeji cuana, miqianaya Jesosa Quitoja epeeji poanijo, ohuaya miqianaya quea pame nee ameesahua cani tii, quea huiso nee.

Jamajjeya miqúanaya ojaya ejjashahuabaquijji ba meesahua canaje quea ja'a nee. Ojaya esohui ba meesahua canaje, huohui meesahua canaje pea'ai. <sup>6</sup> Esohui quea pame nee Jesosa Quitoja eyaya miqúanaya huohui huicha'a huicha'anaje yahuajo. Jamajjeya ojaya esohui jayojja jama miqúanaya atiitiaña. <sup>7</sup> Jamajjeya esejaya Emeshi Mese nei Jesosa Quitoja epoe o'oyajji ishoaña, o jayojjaya jama Edojjoshahua Pameya miqúanaya ameesahua cani quea huiso. <sup>8</sup> E'e, Edojjoshahua Pameya miqúanaya Jesosa jayojja jama amee canijo, Jesosa nijje jjapeequi pajea'yo ajja. Jamajjeya esejaya Emeshi Mese nei poe o'oyajo, Eyacuiñaajiya miqúanaya ba caje mimishi'ama. <sup>9</sup> E'e, Eyacuiñaajiya miqúanaya babaca canaje ojaya Ebacua Ejja nijje, Jesosa Quito nijje ejjapeequijji tii, esejaya Emeshi Mese nei nijje. Eyacuiñaajiya ojaya esohui jayojja jama acaje'yo nei nei, e'e jojo nei; miqúanaya Jesusaja epeejji quea ca'a nee po mee caje'yo tii tii.

*Ojaya epeejji cuana ojee cajjapeequi'yahua Jesosa nijje*

<sup>10-11</sup> Ecuea epeejji cuana, Jesosa Quitoja epeejji Coeja huapa pojjeama poeyanaje e que. Enijje miminaje miqúanajo jama ba'a: —Pabo, Jesosa Quitoja epeejji cuana Conitojo ba'e jjamimicua-jea nobiajeaquiani quea huiso nee —poanaje.

Epeejji cuana, ¿apiojji acuae nequiana jjamimicua-jea nobiajeaquiani so'o? Jamaya miqúanaya quea tai poani.

Jamajjeya ¡shajja'ajjacue mo! Enejaya Emeshi Mese neiya Jesosa Quitohua eya huoojea

canaje ojaya esohui huohuiya. Jamajjeya eyaya miqúanaya huohuiana jama ba'a: Ojjaña miqúanaya Jesosa Quitoja epeeji poanijo ¡ojjaña ojaya ejjashahuabaquijji jayojja jama jjashahuabaquicue! ¡A'a jjamimicuiajea nobiajeaquijji! ¡A'a peapea ejjashahuabaquijji ajji! E'e, ¡ojee jjapeequicue quea bei nee Jesosa nijje! <sup>12</sup> Miqúanaya aje oe beca cuana jama poani ba'a: —Eya ca iña Pabo shajja'ajjajji poani.

Pea ca jama poani ba'a: —Eya ca iña Apono shajja'ajjajji.

Pea ca jama poani ba'a: —Eya ca iña Peno shajja'ajjajji.

Pea ca jama poani ba'a: —Eya ca iña Jesosa Quito shajja'ajjajji poani —nequiana poani, de.

<sup>13</sup> ¿Apiojji acuae nequiana jamaya jjamimicuiajea nobiajeaquime poani so'o? ¿A'a Jesosa ojjañaja mimishi cuijea'yojji pojjeama? ¿A'a ojjaña jaahuanajji pojjeama? E'e, oya ojjaña ojaya epeeji cuanaja mimishi cuijea'yojji, ese jaahuanajji oe nei poani tii tii. Eya pojjeama miqúanaja mimishijo manojeyo. Jesosa Quito ca ca oe miqúanajo manoyonaje acui ecueata'apeejo miqúanajaya mimishi cuijea'yojji. Onaaya miqúanaya besa mee canaje Jesosa nijje jjapeequianijo, enijje jjapeequianijo pojjeama. <sup>14</sup> Jamajjeya eya, Pabo quea bihui poani ecuea miqúanaya besa mee jjimajo. Jesusaja epeeji cuana oe pojji eyaya besa meenaje Quipo, Mayo pea'ai. <sup>15</sup> E'e, eyaya oe pojji besa meenajejo, ejjamimicuiajea nobiajeaquijji pojjeama pea cuana nijje jama ba'a: —Pabohua ecuana besa mee canaje o shajja'ajjajji epojji —e'ajji pojjeama.

E'e, eyaya miquianaya besa meenaje ecuea epeeji epoiji pojjeama.

<sup>16</sup> E'e pojja'a eyaya Etepana, ojaya huapa pojjeama cuana pea'ai besa meenaje. Oe pojji pea cuana besa meenaje pea'ai pojja'a. Cua'a de, pajea'yonaje eyaya. <sup>17</sup> Jesosa Quitoja eya huoojea jjima ojaya epeeji cuana besa meeya. Chojja, ohuaya eya huoojea canaje ojaya esohui quea pame nee huohuiya jama ba'a: —Ecuea esohui quea pame nee huohuiañajo, jeya acui ecueata'apeejo mano'yonajejo oe huohucue! ¡A'a dejjaja ejjashahuabaquijji jayojja jama huohuijji, ma ojaya ejjashahuabaquijji quea ja'a poso acanija! Jamaya ehuohui'yo jojjemo, miya quea sohui ja'a jojjemo ojjaña mi bihuiajji pome. Jamajjeya jamaya ehuohui jojjemo Eyacuiñajji bihuia jjima acame. “Jesosa Quito acui ecueata'apeejo mano'yonaje ecuanaja mimishi cuijea'yojji” ajjima acame onaaya —jamaya Jesosaa eya huohui cani.

*Eyacuiñajjija ejjashahuabaquijji esejaya  
ejjashahuabaquijji jayojja jama pojjeama*

<sup>18</sup> Eyacuiñajjija esohui quea pame nee Jesusajo, oya mano'yonaje esejaya mimishijo shajja'ajja majje shajjama' cuana jama poanaje ba'a: —Cajaa Jesusaja esohui, ma oya ojjañaja mimishi cuijea'yojji poani; acui ecueata'apeejo mano'yonaje cajaa pea'ai —poanaje. Maya Eyacuiñajjiya quijje quea nee nee po mee caje'yo.

Eseya, Jesusaja epeeji cuana ca ca Eyacuiñajjiya ba'e tiitii mee caje'yo. E'e, oja sohui shajja'ajja majje eseya jama poani ba'a: —Eyacuiñajji

quea ca'a nee neeya eseya ba'e tiitii mee caje'yo onijje; oja Bacua Ejja Jesosa acui ecueata'apeejo mano'yonaje esejaya mimishi cuijea'yojji — poani.

<sup>19</sup> E'e, yahuaajo nei Eyacuiñajjiya Isaia tehue mee ca poa jama ba'a:

“Beca cuana jama poani ba'a: —Ecuea eba ojjaña —poani. O shajja'ajjajji poaniya pea'ai jama acani ba'a: —E'e de, ojjaña ojaya eba! —poso acani. Ojjaña ojaya eba poso acani. Eyaya ca ca ojjaña cuana ba meeje ojaya eba oe pojji nei”.

Jamaya Eyacuiñajjiya yahuaajo nei Isaia tehue mee ca poa.

<sup>20</sup> E'e, Eyacuiñajji ese jayojja jama jjashahuabaqui ajja. Ojjaña ba epo poso ohuaya ba cani quea sapa ca'a. E'e, dejja quea huiso esohui bajji, esohui huohuijji cuana, joya dejja cuanaja ejjashahuabaquiijji mimicuiajejanobiajea cani pea'ai quea huiso ba epo poso Eyacuiñajjiya esohuijo Jesusajo jjabahuejjaqui mee ajja jama ba'a: Eyacuiñajjiya eseya ba cani emimishi cuijea'yo Jesosa nijje jjapeequianijo ma dejja cuanajaya ba jjima. Yajja jjabahuejjaqui meeme yajji, quea huiso ba epo poso oya jjabaquiani.

<sup>21</sup> Eyacuiñajjiya ejjashahuabaquiijji quea ja'a poanijo ohuaya eseya ba'e tiitii mee caje onijje, Jesosa nijje jjapeequianijo, ojaya esohui shajja'ajja poquiañajo pea'ai. Ohuaya eya esohui quea pame nee Jesusajo huohui mee canaje. Jamatii ojjaña quea jjashahuabaqui quehua jama poani ba'a: —¿Yajja yajji joya miquianaaya

huohuiaña Jesosa mano'yonaje esejo, esejaya mimishi cuijea'yojji? Quea jjashahuabaqui quehua miya poani, de —jamaya Jesosaja epeeji pojjeama poani.

<sup>22</sup> E'e de, ecuana Jodio cuaa jama acani ba'a: — ¡Eyacuiñajjiya jayojja acue, ma dejjaa ajjima acani! Majoya ecuaaya miya baje e'e jojo nei Eyacuiñajjiya huoojea'yo ojaya esohui huohuijji —jamaya quea tai poani Jodio cuana.

—¡Esohui huohuijji quea huiso ba epo jayojja jama mimicue! Jamajjeya ecuaaya miya baje Eyacuiñajjiya huoojea'yo esohui huohuijji —jamaya quea tai poani Jodio pojjeama cuana.

<sup>23</sup> Ecuana ca ca jama poani ba'a: —Jesosa Quito Eyacuiñajjiya huoojea'yo ojjaña jaahuanajji acui ecueata'apeejo mano'yonaje eseja mimishi cuijea'yojji.

Jesosa Quitoja esohui shajja'ajja sa po ajja jjejojo Jodio cuana quea quene poani, poquiquehuani tii onijje jjapeequi ajja jjejojo. Jodio pojjeama cuaa pea'ai esohui cajaa acani: —Chojja Pabo, miyaya esohui quea ja'a pojjeama huohuiaña — jama siajje pomeya onaya poani.

<sup>24</sup> Jamatii Eyacuiñajjiya Jodio cuana, Jodio pojjeama cuana pea'ai babaca canaje Jesosa Quitoja epeeji nei epo'yojji. Eseyaya, Jesosa Quitoja epeeji cuanaja eba Jesosa Quitoja esohui quea pame nee. E'e, Eyacuiñajjiya Jesosa huoojea canaje mimishi cuijea'yojji. Jamajjeya esejaya eba Eyacuiñajji quea ca'a nee nee, ojjaña ojaya eba. <sup>25</sup> E'e, Eyacuiñajji quea jjashahuabaqui ja'a nee nee. Ojjaña nei nei ojaya eba. Oya quea ca'a nee nee; pea chama' o jayojja. Jamajjeya ohuaya eseya ba'e

tiitii mee caje'yo Jesosa Quito acui ecueata'apeejo esejaya mimishijo mano'yonajejo. Jamatii Jesusaja epeeji pojjeama aje oe jama poani ba'a: — ¿Yajja poajo acuae Eyacuiñajjiya ecuanaja mimishi cuijea ca'yome Jesosa mano'ya poajo? Chojja — acani quea quehua jjashahuabaquiani jjejojo.

*Eyacuiñajjiya eseya babaca canaje ojaya epeeji epojji jamatii onajaya eseya boti'ama*

<sup>26</sup> Epeeji cuana, jjashahuabaquicue! Eyacuiñajjiya miqianaya Jesosa nijje jjapeequi meesahua jjimajo, ¿achajja miqianaya poanaje? Beshahua nei esohui ba po jjima. Beshahua nei ona huoojea po jjima, emeshi mese cuanaja bacua po jjima pea'ai miqianaya poanaje. <sup>27</sup> Jamatii Jesusaja epeeji pojjeamaa jama acani ba'a: —Jesusaja epeeji quea pame pojjeama. Oya cuana quea jjashahuabaqui ja'a pojjeama —jama posoya acani Jesusaja epeeji pojjeama cuaa.

Eyacuiñajjiya ca ca eseya babaca canaje ojaya epeeji epojji, quea huiso esohui ba epo ona quea bicho po meeji. Eyacuiñajji jama poani ba'a: —Jesusaja epeeji pojjeama quea pame pojjeama jjashahuabaquiani —jamaya Eyacuiñajji poani.

<sup>28</sup> E'e, Jesusaja epeeji pojjeamaa eseya niñe ba cani jama ba'a: —Jesusaja epeeji cuana ona huoojeajji jayojja pojjeama, esohui ba po jjima jayojja pea'ai, aema' pea'ai. ¿Ajeo oya cuana eshaja'ajjajji? —poani.

Jamatii Eyacuiñajjiya eseya iyaa ca poa ojaya ebabaca. Jamajjeya ohuaya onaya ba mee caje jama ba'a: —Miya ojjaña ba epo poso poanijo, miqianajaya ejjashahuabaquijji quea tai.

Miquianaya quea pame pojjeama. ¡Quea bicho pocue! —Eyacuiñajjiya acani.

<sup>29</sup> Jamajjeya ae pishana Eyacuiñajji nijje mimije jama ba'a: —Eyacuiñajji, ¡bacue! Eya ca ca iña jamatii quea pame nee —jamaya emimijji pojjeama miya Eyacuiñajji nijje.

Quijje pea'ai ojjaña Eyacuiñajji cojja nei nequi majje quea bicho, quea mete poaje. <sup>30</sup> Jamatii Eyacuiñajjiya eseya Jesosa Quito nijje jjapeequi meesahua ca'yonaje. Ojaya epeeji poanijo, ojaya ejjashahuabaquijji ba meesahua cani. Ojaya esohui jayojja jama ba'e meesahua cani. Mimishi cuijea'yo majje quea bojea po mee cani. Esey ba'e tii tii mee caje'yo onijje, Eyacuiñajjiya. <sup>31</sup> Yahuaajo nei Eyacuiñajjiya esohui etehue'yo jama poa ba'a:

“Jamajjeya ¡esejaya Emeshi Mese nei bihuiacue! Oya oe nei quea pame nee. A'a jama pojji ba'a: —Eya ca ca iña jamatii quea pame nee”.

Jamaya Eyacuiñajjiya esohui etehue'yo poa.

## 2

### *Jesosa Quito acui ecueata'apeejo mano'yonaje*

<sup>1</sup> Ecuea epeeji cuana, yahuaajo miquiana que poe jeahuaa eyaya esohui quea pame Jesusajo huohuinaje. Eya jama po jjima ba'a: —Eya ohueya dejja ojjaña esohui ba epo nei nei. Ecuea emimi quea ja'a. ¡Jamajjeya shajja'ajjacue mo! —jamaya ajjima ecuea.

Chojja, miquiana que poe majje eyaya Eyacuiñajjiya esohui e'e nei Jesosa Quitojo huohuinaje, ma onajaya yahuaajo ba jjima poa. <sup>2</sup> Miquiana que poe jjimahua eya



jjashahuabaquinaje jama ba'a: —Eyaya Conitojo ba'e cuana huohuije esohui quea pame nee Jesosa Quitojo, ma acui ecueata'a peejo mano'yonaje esejaya mimishi cuijea'yojji. Pea esohui huohui jjima aje.

<sup>3</sup> Miquiana que poe majje eya jjashahuaba neineiquinaje jama ba'a: —¿A'a eyaya Eyacuiñajjija esohui huohuije quea ja'a nee pojja'a? —eya quea mete poanaje.

<sup>4</sup> Jamajjeya Edojjoshahua Pame quea ca'a neeya eya huohui meesahua canaje esohui e'e nei miquianajaya eshajja'ajjajji. Esohui huohuijji ojjaña ba epohua jayojja jama ecuea huohui jjima.

<sup>5</sup> Jamajjeya Eyacuiñajjiya miquianaya Jesosa Quito nijje jjapeequi meesahua canajejo, ojaya epeejji nei poanaje. Deija ojjaña esohui ba epohua jama ecuea huohui jjima.

*Eyacuiñajjija ejjashahuabaquijji e'e jojo nei quea ja'a nee*

<sup>6</sup> Jamatii Jesusaja epeejji eyacua pojjeama eyaya huohuiaña; etii jayojja eyaya huohuiaña esohui quea ja'a nee, Eyacuiñajjija ejjashahuabaquijji. Jesusaja epeejji pojjeamaja esohui jayojja jama pojjeama, emeshi mese cuanaja esohui jayojja jama pojjeama eyaya esohui huohuiaña, eshahuaja esohui jayojja jama pojjeama pea'ai. Maya quijje ojjaña ca'a'ama poaje. Eyacuiñajjiya oya cuana ona huoojeajji popajea mee caje'yo.

<sup>7</sup> E'e, ojjaña nei nei Eyacuiñajjija eba. Eyaya Eyacuiñajjija ejjashahuabaquijji quea ja'a nee Jesosa Quitojo huohuiaña. Yahuajo maya ejjashahuabaquijji ba mee jjima ojjaña,

Eyacuiñajjiya. Jjeya ca ca ohuaya eseya, ojaya ehoojea'yo cuana ba mee canaje jama ba'a: Meshi pana jjimahuajo tii Eyacuiñajjiya eseya babaca ca poa Jesusaja epeeji cuana epo'yojji, onijje eba'e tiitii'yojji. Jesosa Quitohua mano'yo majje oja epeeji cuana ba'e tiitii mee caje'yo quea pame nee onijje. Jamaya Eyacuiñajji jjashahuabaquia poa. <sup>8</sup> Maya Jodio pojjeamaja emeshi meseja ba jjima poa; Jodio etii cuanaja ba jjima pea'ai poa. Maya onajaya eba jojjemo Emeshi Mese nei quea ca'a Jesosa Quito bajjani acui ecueata'a peejo mano mee'yo jjima aca quiaye. <sup>9</sup> Jamatii Eyacuiñajjiya yahuajo nei esohui tehue mee ca poa jama ba'a:

“Oya esejaya quea jea neejo, Eyacuiñajjiya eseya quea pame nee acaje'yo, ojjaña ojaya epeeji cuana. Maya esejaya ba jjima ecojjaja, maya esejaya shajja'ajja jjima eshajja, huohui jjima pea'ai. Maya eseya jjashahuabaqui jjima pea'ai. Eseyá ohuaya quea pame nee nee acaje'yo”.

Yahuajo nei jamaya tehue mee ca poa. <sup>10</sup> Maya Edojjoshahua Pameya eseya ba mee cani: Eyacuiñajjiya quea pame nee acani esejo, ma Jesosa Quitohua ojaya epeeji cuana ba'e tiitii mee caje'yo onijje eyajo.

Ojjaña Edojjoshahua Pameja eba. Jamajjeya ese que dobiqúi majje ohuaya eseya ba mee cani Eyacuiñajjiya ejjashahuabaquiiji. <sup>11</sup> ¿Ajea eba oe dejjaja ejjashahuabaquiiji? Ojaya eba ojaye nei ojaya ejjashahuabaquiiji, onajaya ba jjima. Oya jayojjaya Edojjoshahua Pameja eba Eyacuiñajjiya ejjashahuabaquiiji, ojaye neija. Eyacuiñajjiya es-

eya ba'e tiitii mee caje'yo Jesosa nijje jjapeequian-  
 ijo ojaya eba nei. <sup>12</sup> E'e, eseya Jesusaja epee-  
 jji poanijo shajjama' jayojja jama jjashahuabaqui  
 ajja. Jamajjeya Eyacuiñajjiya Edojjoshahua Pame  
 ese que dobiqúi mee canaje. Ohuaya eseya ba  
 mee canaje jama ba'a: Jesusaja epeeji poanijo  
 ca ca oe Eyacuiñajjiya eseya ba'e tiitii mee caje'yo  
 onijje, eseya ojaya quea jea neejo. Quea pame  
 nee nee eseya acaje'yo pea'ai ohuaya. <sup>13</sup> Jamajjeya  
 Jesusaja epeeji pojjeamaja esohui jayojja jama es-  
 ejaya ehuhuiji pojjeama. Chojja, Edojjoshahua  
 Pameya eseya huohui meesahua cani ojaya ej-  
 jashahuabaquiiji quea ja'a Jesusaja epeeji nei  
 cuana huasijje.

<sup>14</sup> Jamatii Jesusaja epeeji pojjeamaja ba  
 jjima Edojjoshahua Pame. Ba meemee ajja  
 Edojjoshahua Pameja ejjashahuabaquiiji, quea  
 quehua nee ojaya. Jamajjeya jama poani  
 ba'a: —¿Apiojji Jesosa nijje ejjapeequiiji? Maya  
 ecuanajaya esohui quea quehua —jamaya poani.

E'e, ojaya jamatii ebajji pojjeama Jesosa Quitoja  
 esohui. Maya Edojjoshahua Pameya eseya ba  
 mee cani. <sup>15</sup> Eseyá ca ca Jesusaja epeeji poani.  
 Edojjoshahua Pameya ese que dobiqúi majje ba  
 mee cani ojjaña eba'eji quea pame; eba'eji quea  
 mimishi pea'ai ba mee cani jama ba'a: —E'e,  
 jamaya. ¡Quea pame nee acue! —amee cani—  
 . Pea'ai quea tai jjashahuabaquianijo, ohuaya  
 jama amee cani ba'a: —Chojja, jamaya quea tai,  
 Eyacuiñajji boti'ama —ameesahua cani pea'ai  
 ojjaña quea ja'a eba'eji.

Maya onajaya quea quehua nee nee. Jamajjeya  
 Jesusaja epeeji pojjeamaja ojaya epeeji eniñebajji

pojjeama jama ba'a: —¿Apiojji miquianaya jama ba'yani? ¿Apiojji ma esohui shajja'ajjaña, huohuiaña pea'ai? —jamaya e'ajji pojjeama onajaya.

<sup>16</sup> E'e, yahuajo Eyacuiñajjija esohui etehue'yo jama poa ba'a:

“Ojjaña Eyacuiñajjija ejjashahuabaquijji ¿ajea eba? Chama!. ¿A'a eseyaya Eyacuiñajji ba meesahuaje? Chojja”.

Jamaya yahuajo nei poa.

Jamatii Jesosa nijje jjapeequianijo, Edojjoshahua Pameya eseya Eyacuiñajjija ejjashahuabaquijji ba meesahua cani.

### 3

*Pabohua Jesosaja epeeji jjabahuejjaqui mee cani*

<sup>1</sup> Ecuea epeeji cuana, miquianaya ebacua esho'i jayojja jama poani, quea jjashahuabaqui ja'a pojjeama poani tii tii. E'e, yahuajo miquiana nijje nequiya eyaya Jesosa Quitoja huohuinaje. Jamatii beshahua nei miquianaya jjashajja'ajjaqui ajja. Jesosa nijje jjapee neinei qui jjima jayojja jama poani; ojaya epeeji pojjeama jama poani. <sup>2</sup> Jiquio ecua ebacua esho'i tojjo ba'e noe quia jjima acani jayojja jama ecuea miquianaya huohui jjima esohui quea ja'a nee quea camaja ebajji. Jjeya pea'ai miquianaya Jesosaja epeeji etii jayojja jama pojjeamajo ma esohuijo jjashajja'ajjaqui ajja. <sup>3</sup> Miquianaaya aje oe Jesosaja epeeji pojjeamaa jayojja tiiya aña. E'e, Jesosaja pea epeeji cuanaja esohui shajja'ajja sa po'yo ajja. Jjamimicuiajea nobiajeaquiani. Jamaya poanijo miquianaya Jesosaja epeeji quea

ja'a pojjeama. Ojaya epeeji pojjeama jama poani, de. <sup>4</sup> E'e, miquianaya aje oe jama poani ba'a: —Eya ca iña Pabo shajja'ajjajji poani.

Beca ca jama poani ba'a: —Eya ca ca Apono shajja'ajjajji.

Jamaya poanijo Jesusaja epeeji quea ja'a nee jama jjashahuabaqui ajja miquianaya, de.

*Ecuana Apono nije Jesusaa huoojea ca'yonaje ojaya esohui huohuijji epoiji*

<sup>5</sup> Eya, Pabo Apono jayojja Jesusaja esohui huohuijji. Ohuaya ecuana huoojea ca'yonaje ojaya esohui huohuiya. Jamajjeya miquianaya Jesosa nije jjapeequi'yonaje ecuanaja esohui shajja'ajja majje. E'e, Eyacuiñajjiya ojjaña ecuana chaco mee cani. Ojaya esohui jama poani eya. Ojaya esohui jayojja jama acani Aponohua pea'ai.

<sup>6</sup> Eyaya Eyacuiñajjiya esohui huohui coonaje miquiana huasijje. Aponohua ma esohui huohui ca o'oyanaje. Eyacuiñajjiya ca ca oe miquianaya ojaya esohui ba meesahua ca'yonaje. E'e, jiquio ecua acui sisi banajjiya bana cani jayojja jama eyaya, Pabohua Eyacuiñajjiya esohui huohui coonaje miquiana huasijje. Echacojjiya acui sisi ebanayo enaa sha cani jayojja jama Aponohua esohui huohui ca o'oyanaje miquianajaya eshajja'ajjajji. <sup>7</sup> Esohui huohui coojjiya, esohui huohui o'oyajjiya pea'aiya ishoa'ajja cani esohui huohui majje. Eyacuiñajjiya ohuaye nei ojaya esohui ba meesahua cani. E'e, jiquio ecua acui sisi banajjiya, acui sisi shajjiya pea'ai chaco majje ishoa'ajja cani a'a acui tiije'yo ebajji jayojja jama Eyacuiñajjiya ohuaye nei acui sisi jayojja tii mee

cani. <sup>8</sup> Ebanajji epo acui sisi shajji jayojja jama jjashahuabaquiiani jama ba'a: —Eya quea pame nee chaco majje, e'acui yiye meseya eya sosequia caje —jjashahuabaquiiani cuana.

E'e jojo nei e'acui yiye meseya jamaya acaje'yo. <sup>9</sup> Miquianaya Eyacuiñajjija acui yiye jayojja. E'acui yiye mese jamaa Eyacuiñajjiya miquianaya quea pame nee jaahuana cani. Jiquio ecua acui yiye chacojji jamaya ecuanaya Apono nijje Eyacuiñajjija echacojji poani; miquiana que ojaya esohui huohuaña.

*Jesosaja epeejji cuana Eyacuiñajjija equi jayojja*

Jiquio ecua e'equi meseya oja equi jaahuana cani jayojja jama Eyacuiñajjiya miquianaya jaahuana cani, ojjaña. <sup>10</sup> Eyacuiñajjiya Jesosa Quito equi yamajjana quea ca'a nee jayojja jama nequi mee cani. Ecua Apono nijje Eyacuiñajjija equi iyajji jayojja jama poani. Jiquio ecua echacojjiya equi iya cani eyamajjana nequia majje equi e'oquejji pojjeama jayojja jama ecuaaaya Jesosaja esohui huohuaña, miquianaya nahueaña pea'ai Jesosa nijje ejjapeequi meesahuajji, quea nee nee epoiji pojjeama cuaquiyo. Eyacuiñajjiya eya huoojea majje quea ca'a po mee canaje ojaya esohui pea cuana huasijje ehuohui coojji. Jamajjeya eya equi yamajjana nequajji jayojja poanaje. Jjeya pea cuaa miquianaya esohui huohui cani e chamajo. Oya equi iyajeyojji jayojja jama poani. ¡Miquiana quea ja'a nee nee casohuihuohui cahua!

<sup>11</sup> Yahuajo Eyacuiñajjiya Jesosa Quito jiquio meshi cuana huasijje huoojea majje eseya huohui

canaje jama ba'a: —¡A'a pea nijje jjapeequijji!  
 ¡Ecuea Ebacua Eja o neija esohui shajja'ajjacue!  
 —acanaje.

Equi iyajjiya eyamajjana quea ca'a nequia cani jayojja jama equi nequi tiitii mee'yojji jayojja jama Eyacuiñajjiya oja Bacua oe nei huoojea canaje ese ba'e tiitii meeya. ¡Oya oe shajja'ajjacue! <sup>12</sup> E'e, esohui huohuijji cuana equi iyajji jayojja. Beca equi iyajjiya equi quea ca'a nee iya cani. Iya cani mei huo'o, mei oshe quea siyo, mei copo quea siyo nee nee pojja'a. Pea cuaa equi iya cani ca'a'ama; acui equi, bequiobo iña, huenihueni equi pojja'a. Jamaya esohui huohuijji quea hueaa acani. <sup>13</sup> Quijje cuaqui poeyajo, equi quiyo'yajo, ojjaña ba caje ache equi iyajji quea pameya equi quea ca'a nee iya canaje, ache equi iyajji quea hueaa equi ca'a'ama iya canaje pea'ai. Oya jayojjaya Jesosa Quitohua poe o'oya majje huohui caje jama ba'a: —Ma esohui huohuijji quea pameya esohui e'e nei huohui canaje. Jamajjeya o shajja'ajjajji cuana enijje jjapeequi pajea jjima acaje. Maya esohui huohuijji quea huea poanaje; quea tai esohui huohui canajejo, o shajja'ajjajji cuana enijje jjapeequi pajea'yonaje.

<sup>14</sup> Jiquio ecua cuaqui poeyajo, equi iyajji quea ja'aja equi nequije quea ca'a jayojja jama Jesosa poe o'oyajo, esohui huohuijji quea ja'a nee Eyacuiñajjiya sosequia caje quea pame nee, oja chaco quea pame sosejje. <sup>15</sup> Equi iyajji quea hueaja ca ca oja equi quiyo jeyojeyoje'yo cuaqui poe'yajo jayojja jama poaje esohui huohuijji quea huea, Jesosa poe o'oyajo. Eyacuiñajjiya oya cuana esosequijji pojjeama. Jamatii equi jiji'yajo dejja cuaya-

jeaquinanani equiyo'yo poajeje jayojja jama oya cuana cuaquijo quiyo'yo ajja poaje'yo, beshahua nei.

*Miquianaaya Eyacuiñajjija equi ja'a quea mimishi ajji!*

<sup>16</sup> Ecuea epeeji cuana Conitojo ba'e, ja'a pajea'yojji eseya Eyacuiñajjija equi jayojja! Edojjoshahua Pame nei ese que dobiquinaje Jesosaja epeeji poanijo. Oya miquiana nijje anijo, miquianaya Eyacuiñajjija equi jayojja poanaje. <sup>17</sup> Eyacuiñajjija ojaya equi quea nahue nee: —Ecuea equi quea pame nee, jehue'ama. Miquianaya ecuea equi jayojja poanaje. Jamajjeya ecuea equi, miquea eyami, nahue ajjajo, quea mimishi poanijo eyaya miquianaya tecueaje —ohuaya acanaje.

*¡Eyacuiñajjija ejjashahuabaquijji quea ja'a bacue, dejjaja pojjeama!*

<sup>18</sup> Ecuea epeeji cuana, ja'a quea jjashahuabaqui quehua pojji! Miquianaya beca cuana jama poani ba'a: —Ecuana quea jjashahuabaqui ja'a poani, dejja ojjaña ba epo jayojja jama poani.

Chojja. ¡Jashahuabaquicue jama ba'a: —Eyacuiñajji, ecuea eba oe pojji nei. ¡Eya ba meesahuacue miquea ejjashahuabaquijji quea ja'a nee! —jamaya oya acue!

<sup>19</sup> Jesosaja epeeji pojjeama quea huiso jamaya jjashahuabaquiani ba'a: —Ojjaña ecuanaja eba quea ja'a nee nee.

Eyacuiñajjiya ca ca onajaya ejjashahuabaqui-jjiyo jama poani ba'a: —Oya cuana quea quehua



jjashahuabaquiani, quea ja'a pojjeama, cajaa — oya poani.

E'e, Eyacuiñajjija esohui etehue'yo yahuajo nei jama poa ba'a:

“Quea huiso jiquio meshi cuanajo ba'e jjashahuaba taiquiani jama ba'a: — Ecuanaja ejjashahuabaquijji quea ja'a nee poani —poso oya poani. Chojja, oya cuana jjadasiaquijji poanijo, eyaya oya jjadasiaqui pajea meeje'yo”.

Jamaya aca poa Eyacuiñajjiya oja sohui etehue'yojo.

<sup>20</sup> Eyacuiñajjija pea esohui yahuajo nei etehue'yo jama poa ba'a:

“Eya oe nei quea jjashahuabaqui ja'a; jjadasia meequi ajja pea'ai. Dejja cuana chojja, ojjañaja ejjashahuabaquijji quea ja'a pojjeama”.

Jamaya yahuajo nei nei tehue mee ca poa.

<sup>21</sup> Jamajjeya ja'a jama pojji ba'a: —Ma esohui huohuijjiya ejjashahuabaquijji quea ja'a nee. Oya cajjashahuabaquiahua —a'a pojji!

¡Bacue! Jesosa Quito miquea Emeshe Mese nei. Ohuaya ojjaña esohui huohuijji huoojea canaje miquiana onijje jjapeequi meesahuua. ¡Jamajjeya shajja'ajjacue! <sup>22</sup> E'e, Eyacuiñajjiya ojaya esohui huohuijji huoojea canaje miquiana huasijje. Ohuaya eya, Pabo ebionei huoojea canaje. Apono, Peno pea'ai huoojea canaje. Ohuaya ojjaña aquiana pana ca poa miquianajaya quea pame nee ejaahuanajji. Miya eshe ani ohuaya jaahuana cani; mano'yajo pea'ai jaahuana caje'yo quea pame nee. Ohuaya jjeyahua nei miquianaya

jaahuana cani. Quijje nei miquianaya jaahuana cajeyo tii tii pea'ai, Eyacuiñajjiya. E'e, Jesusaja epeeji poanijo miquianaya e'aquiiana mese jayojja jama poani. <sup>23</sup> Eyacuiñajji Jesosa Quitoja Chii. Miquianaya Jesosa Quitoja epeeji cuana. Jamajjeya ojjaña Eyacuiñajjija aquiiana quea pame nee miquianajaya poani.

## 4

*¡A'a Jesusaja huoojeayo esohui huohuijji niñebajji!*

<sup>1</sup> ¡Epeeji cuana, ecuana shajja'ajjacue! Eyacuiñajjiya ecuana huoojea ca'yonaje esohui e'e nei Jesosa Quitoja huohuiya, ma yahuajo nei onajaya ba mee jjima poa. <sup>2</sup> ¡Bacue! jiquio ecua echacojjiya o huoojeajji shajja'ajja cani jayojja jama ecuaaya aña. Jamajjeya ohua huoojea cajje ecuaaya Eyacuiñajjija esohui huohuiaña, onajaya esohui pojjeama. Esohui quea pame nee Jesosa Quitoja ehuhui pajea'yojji pojjeama. <sup>3</sup> Jamajjeya ecuea miquianaya eshajja'ajjajji pojjeama ejo jama poani ba'a: —Pabohua quea ja'a nee huohui cani —poani—. Pabohua quea ja'a pojjeama huohui cani —miquiaa ajje, eyaya eshajja'ajjajji pojjeama pea'ai. Onaa jama ejo huohui cajje pea'ai eyaya eshajja'ajja'yojji pojjeama.

Eya pea'ai ecue huohuijo jjashahuabaqui ajja jama ba'a: —E'e pojja'a ecuea ehuhui quea ja'a nee; e'e pojja'a quea ja'a pishana —jamaya eya jjashahuabaqui ajja pea'ai.

<sup>4</sup> E'e, eya jjashahuabaquiani jama ba'a: —Eyaya Jesosa Quitoja chacoaña quea pame nee.

E'e pojja'a. Eyacuiñajjiya ojaya ej-jashahuabaquijji ejo, eya chacoañajo cahuohui cahua quiije. <sup>5</sup> Jamajjeya ecuanaja ejjashahuabaquijji, ojjaña ecuaaya anaje pea'ai miquijanajaya ba jjimajo, ja'a ecuanaya niñebajji! ¡Ishoa socue oe Jesosa Quitoja epoe o'oyajji! Majoya ohuaya, esejaya Emeshi Mese neiya ojjaña cuanaja ejjashahuabaquijji, ojjaña quehuajje acanaje pea'ai ba mee caje. Ojjaña shajja'ajja caje. Majoya eseya quea pame nee anajejo, Eyacuiñajji quea bihui nee poaje: —E'e, jamaya. Miya Jesusaja epeeji quea ja'a nee; quea pame nee ojo chaconaje —eseya acaje ohuaya.

*¡Esohui huohuijji cuana pea jayojjaya quea jea ameya acue!*

<sup>6</sup> E'e epeeji cuana, miquiana jjabahuejjaqui meejji eyaya tehueña Aponojo, ejo pea'ai. Eyacuiñajjiya esohui jama poa ba'a: “¡Oe epeeji quea boti, pea epeeji boti'ama a'a ajji!” Jamaya esohui etehue'yo poa.

Jamajjeya ja'a jama ajji ba'a: —Aponohua quea pame nee acani; Pabohua ca ca quea pame pishana acani —a'a pojji!

¡Ojjaña Jesusaja esohui huohuijji pea jayojjaya oe acue! Jamajjeya miquianaaya ma esohui etehue'yo jayojja jama e'e jojo nei aje. <sup>7</sup> E'e, Eyacuiñajjiya ojjaña Jesusaja epeeji pea jayojjaya ba cani. Ohuaya oe epeeji pea epeeji jayojjaya acani. Jamajjeya ja'a jjashahuabaquijji jama ba'a: —Eya ca ña quea pame nee. Pea cuana quea pame pishana —a'a jamaya jjashahuabaquijji!

Miquianaya ca mi ca oe Eyacuiñajjiya esohui jamatii ba epo poso poani. Chojja, ojaya esohui miquianajaya ebajji pojjeama jamatii. Eyacuiñajjiya esohui huohuijji miquiana huasijje esohui huohui mee majamaja canaje. <sup>8</sup> Miquianaya ca mi ca oe jama poso jjabaquiani ba'a: —Ecuana ca ca oe Jesusaja esohui jayojja jama ba'yani quea pame nee —poso jjabaquiani quiana—. Quea huiso ecuanajaya eba —nequiana poani pea'ai—. Ecuana ca ca ona huoojea'yojji poani Eyacuiñajji nijje. Pabo chojja, ona huoojeajji pojjeama —jamaya poso poani miquianaya.

Miquianaya Eyacuiñajji nijje ona huoojea'yojji e'e jojo nei jojjemo miquianajo eya quea bihui nee pome. Jamaya e'e jojo nei jojjemo ecuana miquiana nijje ona huoojea'yojji pome pea'ai.

*¡Jjashahuabaquicue ecuana quea nee poanaje miquiana sohui huohuijji!*

<sup>9</sup> Eyacuiñajjiya ecuana huoojea canaje ojaya esohui huohuiya. Jamatii ojaya eba ecuana shajja'ajja majje ojjaña soadojo cani jama ba'a: —¿Apiojji shai oya cuana shajja'ajjaje so'o, de? ¡Cua'a, oya cuana quecuajeacue! Ojjaña oya cuana quea tai —jamaya onaya siajje poani.

Ecuana ca ca jjashahuabaquiani jama ba'a: —E'e de, ojjaña meshijo ba'eca cuaa ecuana soadojo cani, ojjaña eyajo aniya pea'ai.

<sup>10</sup> E'e, Jesosa nijje jjapeequianijo, Jesusaja epeejji pojjeama cuaa ecuana niñepoqui poso acani. Miquianaya ca ca ojjaña ba epo poso acani cuaa. Jesusaja epeejji pojjeama cuaa ecuana ona huoojea'yojji jayojja jama pojjeama poso acani.

Miquianaya ca ca ona huoojea'yojji jayojja jama acani. Onaaya ecuana shajja'ajja jjima acani. Jamatii miquianaya shajja'ajja cani. <sup>11</sup> E'e, jjeyahua nei ecuana Jesosa Quitojo mimianijo quea nee poani; ojjaña pojjaajo quea shoe poani. Quea naba taja poani. Daqui chiichiiani ecuanaja. Pea cuaa ecuana cuia cani Jesosa nijje jjapeequianijo. Ecuana poqui majamajani ojjaña cuiñajji yasijje quima' jayojja ecuana. <sup>12</sup> E'e, ecuaaya bobijo janobajjima nei chacoaña. Pea cuana mimijajiyajo, ecuaanaaya mimisaja'a jjima aña. Jama poani ba'a: —Eyacuiñajjiya miquianaya ca-jaahuana cahua —ecuaaya dejja quea tecue aña.

Jesosa nijje jjapeequianijo, pea cuaa ecuana napa cani. Jamatii quea quene po ajja. Jesosa nijje jjapeequi pajea'yo ajja pea'ai. <sup>13</sup> Pea cuaa niñeba cajje ecuaaya esohui quea beiya saja'aña. Jjeya pea'ai pea cuana ecuanajo quea tai mimiani jama ba'a: —Oya cuana Jesusaja epeeji cuana, cajaa. Shabo jama, caquishijeahua —poani.

*¡E jayojja jama pocue Jesosa nijje jjapeequianijo!  
—Pabohua aca poa*

<sup>14</sup> Ecuea epeeji cuana, eyaya jiquio esohui tehueaña miquiana quea yeno po meeji pojjeama. Miquianaya ecuea ebacua jayojja jama poanijo, jjabahuejjaqui mee sa aña. <sup>15</sup> Esohui quea pame nee Jesosa Quitoja eyaya huohuinaje miquiana huasijje. Ecuea esohuijo miquianaya ojaya epeeji poanaje. Jamajjeya eya oe nei mique chii jayojja jama poanaje. E'e pojja'a Jesosa Quitoja sohuihuohuiji quea huiso nee poeje miquiana sohuihuohuiya. Sico meemee

ajja pojja'a, quea huiso nee nee. Jamatii eyaya ebionei miquiana huasijje esohui huohuinajejo miquianajaya chii jayojja poanaje. <sup>16</sup> ¡Jamajjeya ecuea esohui shajja'ajja socue! ¡E jayojja jama pocue!

<sup>17</sup> Jamajjeya eyaya Jesusaja epeeji Timoteo huoojeaje miquiana quea pame ba'e meesahuaa. Timoteo ecuea quea jea nee, Jesusaja epeeji quea ja'a nee poani. Ecuea eba'ejjijo, ecuea esohui Jesosa Quitojo pea'ai ohuaya huohui caje o'oya miquianajaya epajea'yojji pojjeama, ma eyaya ojjaña Jesusaja epeeji cuana ojjaña cuiñajjijo ba'e yasijje huohuiaña. <sup>18</sup> Miquianaya beca cuana shajjama' poani ojjaña miquea eba poso poanijo. Ecuea esohui shajja'ajja sa po'yo ajja. Jjashahuabaquiani jama ba'a: —Pabo poe ajja ecuana baa —poani.

<sup>19</sup> E'e pojja'a Eyacuiñajjiya eya huoojea caje'yo Conito huasijje, miquiana huasijje quijje pishana. Shajjama' cuanaja esohui shajja'ajja maja sa po ajja eya. ¿A'a oya cuana Jesosa nijje jjapeequiani e'e jojo nei? ¿A'a Eyacuiñajjiya oya cuana ojaya esohui huohui meesahua cani quea ja'a nee? Maya eyaya ba sa aña. <sup>20</sup> E'e, quea huiso esohui mimi majamaja majje e'e pojja'a jamatii Jesusaja epeeji pojjeama pojja'a nequiana. Jesosa nijje quea pame nee jjapeequianijo ca ca Eyacuiñajjiya eseya ba'e tiitii mee caje'yo onijje eyajo.

<sup>21</sup> E'e, eya poje'yo miquiana baa. Shajjama' poani tii, tecueajeaje'yo. Ecuea etehue'yo jayojja jama poanijo, eya quea bihui nee, quea bei nee poaje. Jamajjeya ¡ecuea esohui shajja'ajjacue, eya miquiana nijje quea bei epojji!

## 5

*¡Jesosaja epeeji quea mimishi poani beibeiya tecueacue!*

<sup>1</sup> Jesosaja epeeji Conitojo ba'eya eya huohui cañanaje jama ba'a: —Pabo, oe dejjaa Conitojo ba'eya oja shanase cojjo cani, Jesosaja epeejiya, de —acanaje.

Jamaya quea tai nee nee. Eyacuiñajjija boti'lama nei nei. Jesosaja epeeji pojjeama jama po ajja, quea mete oya cuana. <sup>2</sup> Jamatii miquianaya aje oe bicho'ama jjejojo jama poani ba'a: —Ecuana quea pame nee ba'e —nisho poani.

¡Oe epeeji quea mimishi nee poanijo, quea yeno pocue! Ma dejja oja mimishijo yeno'ama po jji-majo, ¡a'a onijje jjapeequijji! ¡Jesosaja epeeji cuana nijje a'a dobiqúi meeji!

—¡A'a ecuana nijje Eyacuiñajjija equi yasijje do-biquijji! Eyacuiñajjiya miya eshajja'ajjajji poj-jeama —oya acue.

<sup>3</sup> Eya quea huesha nee yani; miquiana nijje nequi meeme ajja. Jamatii miquianajo jjashahuaba majamajaquiani tii. ¡Eya Jesosaja epeeji etii ojaya ehoojea'yo poanijo, shajja'ajjacue mo! Ecuea ejjashahuabaquijji ma dejja quea mimishijo jama ba'a: —Oya quea mimishi poanijo, ¡quea bicho nee po meecue! —eyaya miquiana nijje nequiya jjemo jamaya huohuime.

<sup>4</sup> Jamajjeya miquianaya Eyacuiñajjija equi yasi-jje ojee poe majje, Jesosa Quito esejaya Emeshi Mese nei miquiana nijje anije, miquiana quea jjashahuabaqui ja'a po meeji ojaya esohui jayojja jama ameesahua caje. Eya pea'ai miquiana nijje

jjashahuabaquianijo miquiana nijje nequi jayojja poaje. <sup>5</sup> Jamajjeya ojee poe majje ima dejja mimishi tecueacue jama ba'a: —¡Edosiquianaa mi huoojeajji poaniya miya canapa cahua! —jamaya acue oja mimishijo quea yeno epojji!

Quea yeno po majje oja mimishi pajea caje'yo. Manoje'yo pojja'a. Jamatii esejaya Emeshi Mese neiya Jesosaa poe o'oya majje ma dejja huoojea ajja cuaqui yasijje, ca ohua mimishi pajea ca'yajo.

<sup>6</sup> Dejja quea mimishi miquiana nijje jjapeequianijo, jamatii miquianaya bicho'ama poanaje. Jamaya quea tai. Miquianajaya eba jiquio esohui jama ba'a: “Oe pojji neiya pahui shejjeemeejjiya ñahuahuo cajje pahui shejee mee cani” jamaya onaaya huohui cani. <sup>7</sup> E'e, mimishi eshejjeemeejji jayojja jama poani. Oe dejja quea mimishi minijje ojee jjapeequianiya ojjaña quea mimishi po mee caje o jayojjaya. ¡Mimishi cajaa acue, ojjaña! Jamajjeya miquianaya quea mimishi po ajja, pahui eshejjeemeejjima' jayojja poaje. E'e, yahuajo nei Jodio cuaa Ejito meshijo nequiya ñajjajja cuia ca'ya poa ebacua cuana emano'yojji pojjeamajo jama jayojjaya Eyacuiñajjiya Jesosa Quito esejo mano mee ca'yonaje eseya onijje eba'e tiitii'yojji. <sup>8</sup> E'e, Jodio cuana pahui eshejjeemeejjima' ojee ijjiia cani Eyacuiñajjiya etiiquianaja ebacua cuana mano mee'yo jjima aca poa shahuaba'yojji. Jamaya jayojja Jesosa esejo mano'yonajejo, eseya caba'yahua mimishi'ama e'e jojo nei. E'e, jamaya ba'yanijo Jesosa eseja mimishijo mano'yonaje esejaya epajea'yojji pojjeama. Jamajjeya jiquio ecua Jodio cuaa ñajjajja cuia'yo majje ojee ijjiia cani jayojja, etiiquianaja bacua cuana mano mee'yo jjima



aca poa shahuaba'yojji jayojja jama eseyaya aña Jesosajo.

<sup>9</sup> Yahuajo pishana eyaya miqiana huasijje pea esohui etehue'yo huoojeanaje. Ma etehue'yojo eyaya jama huohuinaje ba'a: —¡Jesosaja epeeji quea mimishi nee poani nijje a'a jjapeequijji! ¡Joya pea cojjojji nijje a'a jjapeequijji! ¡Ona napajji nijje, quea mimishi jjashahuabaquiani nijje pea'ai a'a jjapeequijji! —eyaya miqiana huasijje tehuenaje.

<sup>10</sup> Eyaya jamaya tehuenaje Jesosaja epeeji quea mimishijo. Jesosaja epeeji pojjeamajo jamaya tehue jjima. E'e, mimishi cuana quea huiso nee yani: Quea nahue poani, sii poani, eshahua nijje mimiani pea'ai. Jamajjeya dejja mimishi pejjejo ba'e sa po'yo ajjajo jiquio meshijo ba'e meemee ajja. ¿Achejo dejja mimishi chama' huasijje eba'eji? <sup>11</sup> Beca cuana ca ca jama po nishoani ba'a: —Epeeji cuana, eya Jesosaja epeeji pea'ai —poani. Jamatii oya cuana aje oe quea mimishi poani: Pea cojjojji poani, quea dejja tai, quea nishehui poani, quea mimijjequijjea poani, meshi epana bihuia cani, ishi'ishiani, sii poani, shajjama' poani pea'ai. ¡Jesosaja epeeji jama poajo, onijje a'a jjapeequijji, a'a anioqueji e'ijjia'ijjiajji!

<sup>12</sup> Eyacuiñajjiya eya huoojea jjima Jesosaja epeeji pojjeama tecueaa jama ba'a: —¡Miquianaya quea ja'a pojjeama ba'yanijo quea nee nee poaje!

¡Eyacuiñajjiya ca ca oya cuana catecueajea cahua! Ohuaya ecuana huoojea canaje Jesosaja epeeji quea mimishi cuana jjabahuejjaqui meeya.

<sup>13</sup> Jamajjeya Jesosaja epeeji miqiana nijje nequi

quea mimishi poajo, ¡niñeshe'acue: —Miya quea ja'a pojjeama poani —oya acue!

Jamajjeya ¡Eyacuiñajjija esohui yahuajo tehue'yo jayojja jama acue! Yahuajo nei nei jama poa ba'a: “Ecuea epeeji quea mimishi poanijo, ja'a miqiana nijje nequi meeji, ecuea epeeji cuana nijje! ¡Huojeacuayajea'yocue esecue yasijje!”

Jamaya yahuajo nei Eyacuiñajjija esohui etehue'yo poa.

## 6

*¡A'a epeeji cuana dojojji dejja etii yasijje ca Jesusaja epeeji pojjeama huasijje!*

<sup>1</sup> Miqianaya Jesusaja epeeji poanijo ecuea huapa pojjeama cuana poani. Jamajjeya Jesusaja epeeji nijje quea quene po majje Jesusaja epeeji pojjeama huasijje dejja etii yasijje ja'a oya dojojji ojaya ejjashahuabaquijji baa! Chojja. ¡Jesusaja epeeji etii yasijje poquicue! Eyacuiñajjiya ojaya epeeji etii huohui meesahua caje quea ja'a nee ojjaña quea bei epo meeji. <sup>2</sup> E'e, eseya Jesusaja epeeji cuana quijje onijje ona huoojeajji poaje. Jamajjeya ¡jjeyahua nei ojjaña ojaya epeeji cuana quea bei po meesahuacue pea epeeji cuana nijje! ¡O huoojea'yojji nei jayojja jama oya cuana quea pame nee ameesahuacue! <sup>3</sup> E'e, Jesusa poe o'oyajo, eseya esohuidojojji eyajo nequi huoojea'yojji poaje'yo onijje pea'ai. Jamajjeya ¡iquio meshijo nequiya ¡Jesusaja epeeji pea cuana nijje jjamimicuiajea nobiajeaquiani quea bei po meecue! ¡Oya cuana shajja'ajja majje quea ja'a

nee huohuicue! <sup>4</sup> Jamajjeya Jesusaja epeeji nijje jjamimicuiajea nobiajeaqui majje ¡a'a poquiiji dejja etii yasiije, Jesusaja epeeji pojjeama huasiije miqiana quea bei epo meeji! <sup>5</sup> Jamaya poanijo miqianajaya ejjashahuabaquiiji quea tai poani. Jamajjeya miqianaya jjamimicuiajea nobiajeaqui majje ¡Jesusaja epeeji etii iyaacue! Ohuaya miqianaya quea bei po mee caje pea epeeji nijje. <sup>6</sup> Jamajjeya Jesusaja epeeji nijje mimijaji majje ¡a'a jja oe oya dojojji Jesusaja epeeji pojjeama huasiije ojaya ejjashahuabaquiiji huohui meeya! Jamatii miqianaaya ca ca quea tai aña.

<sup>7</sup> E'e, miqianaya ca mi ca oe Jesusaja epeeji pojjeama jayojja jama poani. Jesusaja epeeji nijje jjamimicuiajea nobiajeaqui majje oya dojoaña Jesusaja epeeji pojjeama huasiije. ¡A'a jja oe jamaya pojji! Chojja, miqianajaya epeeji minijje quea tai poajo, jamatii ¡a'a jjamimicuiajea nobiajeaquiiji! ¿Yajjajo acuae jjaya jamatii mi sii mee'ajjaña? <sup>8</sup> Miquianaaya ca ca oe Jesusaja epeeji cuana minijje nequi quea tai aña, oya cuana dasiaña, onajaya aquiana siiyaña pea'ai, de. Jamaya quea tai. <sup>9</sup> ¡Jjashahuabaquicue oe! Miquianajaya eba mimishi cuana Eyacuiñajji nijje eba'eji pojjeama eyajo ojaya cuiñajji eyacuajo. Eyacuiñajjija esohui a'a pajea'yojji jama ba'a: "E'e jojo nei ojjaña quea mimishi poani pea nijje, ojjaña eshahua nijje mimiani, peaja ehuanase sii cani pea'ai, onaja yahue sii cani pea'ai, dejja cuana pea dejja nijje jjacojjoquiani, epona pea epona nijje yahue nisho poani pea'ai, <sup>10</sup> siipojji cuana pea'ai, quea dejja tai poani pea'ai,

ehuo0 nei po huicha'a huicha'ani pea'ai, pea siajje ajji poani pea'ai, shajjama' cuana pea'ai Eyacuiñajji nijje eba'ejji pojjeama eyajo ojaya cuiñajji eyacuajo". <sup>11</sup> Jamaya yahuajo miqúanaya poanaje Jesosa nijje jjapeequi jjimahua. Jjeya ca ca esejaya Emeshi Mese neiya, Jesosa Quito-hua miqúanajaya mimishi cuijea ca'yajje quea boejea po mee ca'yonaje. Jamajjeya miqúanaya jjeya ba'yani Eyacuiñajjijo. E'e, Jesosa Quito esejaya Emeshi Mese nei miqúanajaya mimishi cuanajo mano'yonaje. Miqúanaya quea boejea po mee ca'yonaje. Jamajjeya Eyacuiñajjiya miqúanaya ba cani mimishi'ama. Edojjoshahua Pameya miqúanaya Eyacuiñajjija esohui jayojja jama ba'e meesahua cani pea'ai. Jamajjeya ojjaña Jesosaja epeeji cuana nijje quea bei, quea pame nee ba'ecue! ¡Mimishi'ama pocue!

*¡Eyacuiñajjijo chacocue quea pame nee!*

<sup>12</sup> Epeeji cuana, miqúanaya eya huohui'ajjanaje esohui etehue'yojo jama ba'a: —Eya ca ca Jesosaja epeeji. Jamajjeya eyaya ojjaña aña mete'amaa jjejojo, ma Jesosaja epeeji pojjeama cuaa acani —jamaya miqúanaya poani quea quehua jjashahuabaquianijo.

Eya ca ca jama poani ba'a: —Pea cuana jayojja jama ba'e majje miqúanaya quea pame pojjeama poaje —eya poani. E'e pojja'a eya mimije jama ba'a: —Ojjaña pea cuana jayojja jama eyaya aje —poaje.

Jamatii eya jamaya emimiji pojjeama. Chojja, jama po majje quiije eyaya jamaya apajea'yo jjima aje. E'e, jiquio ecua echacojjiya o chacomeejjija

esohui apajea meemee ajja jayojja jama quijje eyaya maya apajea'yo jjima aje.

<sup>13</sup> Bobi ijja majje see ai yasijje dobiqiani. Bobi chamajo see ai quea nee poaje. Jamatii quijje eyajo ba'e'yo majje eseya bobi ijja pajaje'yo. Quea shoe pojjeama poaje'yo. Jamaya Eyacuiñajjiya acaje'yo. Jamajjeya ja'a jjashahuaba tiitiqijji bobijo quea jeje nee epojji! Jama jjashahuabaquime pocue ba'a: — Eya Eyacuiñajjiya equi jayojja. Oya ecuea eyamijo ba'yani. Eya quea jeje jayojja po mee cani.

E'e, Emeshi Mese neiya, Eyacuiñajjiya ecuea eyami quea pame nee pana ca poa. Jaahuana cani quea pame nee pea'ai oja equi jayojja epojji. Ohuaya ecua pana ca poa quea mimishi nee pea nijje epojji pojjeama; onajaya ehuanase, yahue pojja'a esijji pojjeama pea'ai. <sup>14</sup> Jamajjeya esejaya Emeshi Mese nei Jesosa Quito mano'yajo, Eyacuiñajjiya oya shequi mee ca o'oyanaje. Jamaya ohuaya eseya ba'e mee caje o'oya pea'ai. Quea ca'a nee nee poaniya jjejojo ojjaña acaje'yo ohuaya.

<sup>15</sup> Jesosa Quitoja epeeji poanijo ojjaña eseya ojaya eyami jayojja jama poani. Jamaya miquijanajaya eba. Jamajjeya ipea cojjoji nijje a'a jaaji! Chojja. Jamaya poajo Eyacuiñajji miquijana nijje quea tecue nee nee poaje. <sup>16</sup> E'e, dejja epona quea mimishi nijje jaa majje oya cuana oe yamime jayojja poani. Jamaya Eyacuiñajjiya oya cuana ba cani. Miquea eba Eyacuiñajjiya esohui etehue'yo jama ba'a: “Dejja epona nijje jaa majje oya cuana oe yamime jayojja poani”. <sup>17</sup> Emeshi Mese nei

Jesosa nijje jjapeequi majje ca ca eseya o jayojjaya jama jjashahuabaquime poani pea'ai.

<sup>18</sup>Jamajjeya eyaya miquianaya huohuiaña jama ba'a: Dejja cuana, jepona miquea ehuanase pojjeama nijje a'a jaajji! Epona cuana, ja'a pea dejja nijje jaajji! ¡Jiñayii acue! Quea mimishi po majje miquea eyami nei quea tai poaje. ¡Ojjaña mimishi cuana a'a ajji pea'ai! <sup>19</sup>¡Bacue! Miquea eyami Edojjoshahua Pameja equi jayojja jama poani. Oya mique yami dojjo huasijje nequidobiqui'yonaje. E'e, Eyacuiñajji mi huoojeajji poani. Ohuaya huoojea ca'yonaje Edojjoshahua Pame miquiana que dobiquiya. <sup>20</sup>Oya mi mesenajji epo. E'e, Jesosa Quito mano'yonaje miquianaja mimishi cuijea'yojji sosejje. Jamajjeya ¡ojaya esohui jayojja jama ba'ecue! Miquianaya jama ba'yajo, pea cuaa mi ba majje Eyacuiñajji bihuia caje jama ba'a: —Eyacuiñajji quea ca'a nee nee. Ojaya epeejji quea pame nee ba'e meesahua cani —poaje.

## 7

*¿A'a shacuima' nequi cuana cajjahua-naquiahua?*

<sup>1</sup>Yahuajo pishana miquianaaya esohui tehue-naje ecuea ebajji. Ma esohui etehue'yojo eya miquiaaya huohui'ajjanaje jama ba'a: —¿A'a shacuima' nequi cajjahua-naquiahua? ¿A'a jamatii canequiahua pojja'a? —huohui'ajjame miquianaaya eya anaje.

Jamajjeya jjeya eyaya miquianaya saja'aña. E'e, shacuima' nequi eshacui sa po'yo ajjajje ca jamatii canequiahua. Jamaya quea pame. <sup>2</sup>Jamatii quea

huiso shacuima' nequiya epona cuana jea ba cani, onaja huanase sii cani. Epona ahuema'ani jamaya quea mimishi poani pea'ai. Jamajjeya cajjahua-naquiahua, cajjahueaquiahua pea'ai, ojjaña. Jamaya quea pame nee.

<sup>3</sup> Yahue cuaa, ¡miquea ehuanase quea bihui nee po meecue! ¡Jaahuanacue quea pame nee pea'ai! Ehuanase cuaa, ¡miquea yahue quea bihui nee po meecue! ¡Onijje tii jaacue! <sup>4</sup> ¡Mique yahueya huohui cani jayojja jama pocue onijje jaanijo! Yahue, ¡miquea ehuanase nijje jaanijo ohua sa cani jayojja jama acue! <sup>5</sup> E'e pojja'a yahue, ehuanase pea'ai mimi sa poani Eyacuiñajji nijje beca cahuime. Eyacuiñajji nijje mimianijo yahue ojaya ehuanase nijje jaa sa po ajja pojja'a. Jamaya quea pame, ca ehuanase yeno'ama poanijo. Beca cahui cuana Eyacuiñajji nijje mimi majje ¡yahue oja ehuanase nijje cajjacojjoqui o'oyahua! Jamajjeya ehuanase yeno'ama, yahue pea'ai yeno'ama poaje. Quea yeno poajo, eshahuaa oya cuana quea mimishi jjashahuabaqui mee ca chana' pea cojjoji epojji. E'e, yahue, epona pea'ai ca'a'ama.

<sup>6-7</sup> Ecuea epeeji cuana, jiquio esohui etehue'yo ecuea ejjashahuabaquijji jama ba'a: Eya ca ca shacuima' nequi. Ojjaña Jesusaja epeeji e jayojja jama shacuima' nequi, ahuema'ani pea'ai quea pame nee chaco majamajaje Jesusa Quitojo. Jamatii eyaya miquianaya jamaya epojji pojjeama huohuiaña. Eyacuiñajjiya beca cuana quea pame nee ba'e meesahua cani jamatii shacuima' nequi, ahuema'ani pea'ai. Pea cuana ca ca jamatii ani quea mimishi po chana'. Jamajjeya oya cuana cajjahua-naquiahua, cajjahueaquiahua pea'ai. ¡Ey-

acuiñajjija ejjashahuabaquijji mijo ohua acani jayojja jama acue!

<sup>8</sup> Jamatii eya jjashahuabaquiani shacuima' nequijo, eshacuimanojo, ahuema'anijo, e'ahuemanojo pea'ai jama ba'a: Eya ee nei, shacuima' nequi. Miquianaya e jayojja jama mee nei nequi majje jama quea pame nee nee poaje. <sup>9</sup> Jamatii e'e pojja'a miquianaya beca cuana ehuanase chamajo mimishi'ama eba'ejji pojjeama. Jamajjeya ijjahuanaquicue! E'ahuemano cuana, miquiana ahuema'ani jayojja mimishi'ama eba'ejji pojjeama. Jamajjeya ijjahueaqui'yocue! Jamaya quea pame. Miquianaya quea yeno mee nei ba'yanijo quea mimishi po chana'. Jamaya quea tai.

*¿A'a Jesusaja epeeji cuana huei cajji?*

<sup>10</sup> Jjeyahua nei eyaya Eyacuiñajjija esohui tehueje yahue cuana huasijje, ehuanase cuana huasijje pea'ai miquianajaya ebajji jama ba'a: Ehuanase cuana, imiquea yahue oe nei nijje ba'ecue! ¡A'a oya hueijji! <sup>11</sup> ¡Huei majje ca oe ahuema' ba'e tiitii'yocue! ¡E'e pojja'a miqueahue jjeshe o'oyacue! Jamaya quea pame nee. Yahue cuana, ¡oya jayojja a'a miquea ehuanase hueijji! ¡Jaahuana tiitiicue! ¡Eyacuiñajjija esohui jayojja jama acue!

<sup>12</sup> Jjeya ca ca eyaya pea esohui tehueje, ma Jesusaa tehue mee jjima, ecuea ejjashahuabaquijji tehueje pea cuana huasijje, Jesusaja epeeji cuana huasijje. Yahue cuana, e'e pojja'a miya Jesusaja epeeji poani, miquea ehuanase Jesusaja epeeji pojjeama. Jamatii miquea ehuanase minijje ba'e



sa poanijo, ¡a'a oya hueijji! <sup>13</sup> Ehuanase cuana, e'e pojja'a miya Jesusaja epeeji poani, jamatii mique yahue Jesosa nijje jjepeequi jjima. Miqueahue minijje ba'e sa poanijo, ¡a'a oya hueijji! <sup>14</sup> Miya Jesusaja epeeji poanijo, miqueahue minijje ba'e sa poanijo, Eyacuiñajjiya oya quea pame acaje Jesusaja epeeji nijje ba'e sa poanijo. Yahue cuana, oya jayojja miquea ehuanase miquea huei jjima minijje ba'e sa poanijo, Eyacuiñajjiya oya quea pame acaje pea'ai miya Jesusaja epeeji poanijo. Oe yamime jayojja ohuaya micuana ba cani. Jamajjeya ohuaya miquianajaya ebacua cuana jaahuana caje pea'ai. Jesusaja epeeji pojjeamaja bacua cuana jama pojjeama oya cuana.

<sup>15</sup> ¡Jiquio esohui bacue pea'ai, epeeji cuana! Eyacuiñajjiya ojaya epeeji cuana quea bei ba'e mee sa acani. Jamajjeya miquea ehuanase Jesusaja epeeji pojjeama jjejojya minijje ba'e sa po'yo ajja po majje capoquiahua. E'e, Jesusaja epeeji pojjeama Jesusaja epeeji nijje ba'e sa po'yo ajja capoquiahua, epona, yahue pea'ai. Jamajjeya Jesusaja epeeji e'ahuemano jayojja anije, eshacuimano jayojja jama nequije. <sup>16</sup> Jamajjeya ehuanase cuana, ¡miquea yahue nijje anicue, jamatii oya Jesusaja epeeji pojjeama! Oya Jesosa nijje jjapeequije pojja'a mi quea pame ba'yani ba majje. Yahue cuana, ¡miquea ehuanase Jesusaja epeeji pojjeama nijje ba'ecue! Jamajjeya oya Jesosa nijje jjapeequije pojja'a.

*¡Eyacuiñajjiya ejjashahuabaquijji jayojja jama ba'ecue!*

<sup>17</sup> Eyacuiñajjiya ojjaña miqúanaya ojaya echa-cojji po mee cani. Oe epeeji pea epeeji jayojja jama chaco ajja. E'e, Eyacuiñajjiya miqúanaya huoojea cani ojo chacohua. Peapea chaco meeme asahua cani. ¡Jamaya atiitiicue! Jamaya eyaya huohuiaña ojjaña Jesosaja epeeji cuana ojjaña cuiñajji cuanajo ba'e yasijje. <sup>18</sup> Jamajjeya oe epeeji Jesosa nijje jjapeequianijo cuiishasha jehuissejjajea ca'ya poa, Jodio cuaa jjejojo. ¡Jamatii nequicue! Pea dejja cuiishasha ejehuissejjajea'yo pojjeama Jodio dejja pojjeama jjejojo. ¡Jamatii nequicue, cuiishasha jehuissejjajea jjima tii! <sup>19</sup> Jjeya nei Jesosa nijje jjapeequianijo, Eyacuiñajjiya eseya jama ajjima ba'a: — ¡Cuiishasha jehuissejjajea meecue! —po ajja eseya jjeya.

—¡A'a cuiishasha jehuissejjajea meeji! —po ajja pea'ai jjeya.

Chojja. Jjeya Jesosa nijje jjapeequianijo, Eyacuiñajjiya eseya jama acani ba'a: —¡Ecuea esohui jayojja jama ba'ecue! —ohuaya eseya acani.

<sup>20</sup> Jamajjeya ¡miqúanaya Jesosa nijje jjapeequi jeahuajo jayojja jama anicue quea pame nee! Jama ba'a: <sup>21</sup> Eyacuiñajjiya miqúanaya iyaa canajejo, beca cuana echacojji sosema' poanaje. ¡Jamaya anicue yeno'ama! Jamatii miya miquea echaco meseja nahue'amajo, poqui sa po majje ¡poquicue, miquea yajjijo chacoquicue! <sup>22</sup> Jamajjeya beca cuanaja echaco mese yanijo, ¡ojaya esohui jayojja jama cachaco cahua! Eseyaya Emeshi Mese nei Jesosaa oya cuana iyaa cajje ca ca oya echaco mesema' jayojja jama jjashahuabaquime poani. ¡Jesosaja ejjashahuabaquiji jayojja jama ca'a cahua! Oya

jayojjaya pea cuaa echaco mesema' nequiya chaco cani ojaya yajji. Jamatii Jesosa Quito oya cuana iyaa cajje ojaya ejjashahuabaquijji jayojja jama ca'a cahua pea'ai. Jama ba'a: Jesosa nijje jjapeequi jjimahuajo eseya eshahuaja echacojji sosema' poa ojjaña. Jesusaa iyaa majje eseya poqui mee canaje eshahuajo echaco majajji pojjeama. Jamajjeya Jesusaja ejjashahuabaquijji jayojja jama ejja'a qui, esejaya Emeshi Mese neiya.  
<sup>23</sup> E'e, Eyacuiñajjiya eseya jjeshe ca'yonaje quea nahue nee nee, Jesosa Quito esejo mano'yonaje sosejje. Jamajjeya ¡ojaya esohui jayojja jama atiitiicue, onajaya pojjeama! ¡Ojo oe chacocue!  
<sup>24</sup> ¿Ae shai po aninaje miquianaya Eyacuiñajjiya iyaa jjimahuajo? ¡Jamaya atiitiicue quea bei! Eyacuiñajjiya miquianaya jaahuana caje'yo quea pame nee.

*Pea etehue'yo shacuima' nequi yasijje, ahuema'ani yasijje pea'ai*

<sup>25</sup> Miquianajaya etehue'yojo yahuajo eya huohui'ajjanaje nequiaa jama ba'a: —¿Yajja acuae poaje shacuima' nequi, ahuema'ani pea'ai? — tehuenaje nequiaa.

Maya esejaya Emeshi Mese neiya Jesusaa eya huohui jjima shacuima' nequijo, ahuema'anijo pea'ai. Eyaya ecuea ejjashahuabaquijji tehueaña miquianajaya ebajji. Jamatii Eyacuiñajjiya eya babaca canaje esohui quea pame nee Jesusaja ehuhuijji. Ohuaya eya esohui e'e nei huohui meesahua cani tii pea'ai. Jamajjeya ¡ecuea esohui shajja'ajjacue!

26 Jjeya Jesosaja epeeji pojjeamaa eseya napa cani quea huiso nee. Jamajjeya quea camaja eba'ejji. Jamajjeya epona cuana, jjeya nei miya ahuema'ani, jamaya ba'ecue! Shacuima' nequi cuana pea'ai, jamatii ba'ecue! Jamaya eya jjashahuabaquiani. 27 Jamatii miquea ehuanase yanijo ¡a'a oya hueijji! Miya shacuima' nequiya, ¡a'a ehuanase sajji! 28 Eponajo jjahuanaqui sa poanijo miya quea mimishi pojjeama; jamaya quea pame. Epona, miya jjahueaqui sa poanijo quea pame, quea mimishi pojjeama pea'ai. Jamatii jjahuanaqui majje quea camaja poaje miquianajaya eba'ejji, bobijo, aquiana eba'ejjijo. Ehuanasejo quea huiso jjashahuabaqui majamajaje. Ebacua quea huiso po majje quea camaja poaje. Eya ca ca shacuima' nequi. Eba'ejjijo jjashahuabaqui tiitii ajja. Jamajjeya miquianaya e jayojja nequianijo miquea eba'ejji camaja'ama pishana poaje.

29 Ecuea epeeji cuana, eya jjashahuabaquiani jama ba'a: Epojja Jesosa Quitoja epoe o'oyajji beshahua nei apoa. Jamajjeya ¡a'a jjashahuaba tiitiiquijji miquea ehuanase neijo! ¡Jesosa Quitojo oe jjashahuaba neineiquicue! 30 E'e, Jesosa Quito poe o'oyani. ¡Ojaya epoejjijo jjashahuaba tiitiiquicue! Jamajjeya ¡a'a quea yeno po tiitiiji eba'ejji quea camajajo, emano'yojo pea'ai! ¡Quea bihui nee nee poani, a'a jjashahuaba tiitiiquijji pea'ai! ¡A'a jjashahuaba tiitiiquijji aquiana jjeshejjijo, meshi cuana jjeshejjijo pea'ai! 31 Echaco quea huisojo jjashahuabaquianijo ¡a'a Jesosa Quitojo jjashahuabaqui pajea'yojji! Oya Jesosa poe o'oyajo jiquio meshi cuana, ojjaña

aquiana cuana pea'ai chama'yo tii poaje'yo.  
<sup>32</sup> Jamajjeya ¡a'a miquianajaya aquiana quea huiisojo jjashahuabaqui majamajajji! Jesusaja epeeji shacuima' nequi jjashahuabaquiani Jesosa Quitojo, ojaya ejjashahuabaquijji jayojja jama a sa neinei poani tii. <sup>33</sup> Yahue ca ca jjashahuabaquiani ojaya ehuanase quea bihui nee epo meeji. Jamajjeya oya quea huiiso aquianajo jjashahuabaquiani. <sup>34</sup> E'e, shacuijji Jesosa Quito oe neijo jjashahuabaqui tiitii ajja. Oya ojaya ehuanasejo quea huiiso jjashahuabaquiani pea'ai. Epona Jesosa Quitoja epeeji ahuema'ani Jesusajo jjashahuabaquiani. Jesusaja ejjashahuabaquijji jayojja jama a sa poani. Ojo chaco sa neinei poani pea'ai. Oja yahue enequijo, ehuanase jjashahuabaquiani quea huiiso ojahue quea bihui po meeji. Jesosa Quito oe neijo jjashahuabaqui tiitii ajja. Jamajjeya oya quea huiiso aquianajo jjashahuabaquiani.  
<sup>35</sup> Jamajjeya epeeji cuana, eyaya jiquio esohui tehueaña miqiana quea pame ba'e meesahuajji, mijo quea camaja epo meeji pojjeama. E'e, eyaya miqianaya jama ajjima ba'a: —¡A'a jjahueaquijji! ¡Miquianaya quea pona jea nee po majje jamatii a'a jjahuanaquijji! —jamaya ecuea miqianaya huohui jjima. Chojja, eyaya miqianaya huohuiaña jama ba'a: —¡Jesusa nijje quea ja'a nee jjapeequicue! ¡Ojaya esohui jayojja jama ba'ecue! ¡Quea huiiso nee jjashahuabaquicue Jesusajo, aquiana cuanajo pojjeama! ¡Onijje chacocue! —jamaya eyaya aña miqianaya.  
<sup>36</sup> Shacuima' nequiija ebajji eyaya jama tehueaña ba'a: E'e pojja'a miqianaya yahuajo

jama poa ba'a: —Ecuana ejjahuanauquiji pojjeama Jesosaja epeeji pojjeamaa ecuana quea huišo napa canijo. Quea camaja nee poaje —poa yahuaio.

Jamajjeya shacuima' nequi cuana, miquea eshiye mese ahuema'ani jaajaa epo, miya huana sa neinei poanijo ¡oio jjahuanauquie! Jamaya quea pame nee, mimishi'ama. <sup>37</sup> Jamatii shacuima' nequi oja shiye nijje ojaya ejjashahuabaqui'yojjijo jama poaje pojja'a ba'a: —Eya ca ca iña jjahuanauqui sa po'yo ajja pea'ai. Eya quea pona jea nee pojjeama, quehuajje jjacojjoqui ajja nei nei —jamaya e'e joio nei jjashahuabaqui majje jamatii canequiahua oya cuana, jjahuanauqui jjima tii. Jamaya quea pame nee nee. E'e, onaaya Jesosaja epeeji napa canijo, quea camaja poaje jjahuanauqui majje. <sup>38</sup> Jamajjeya shacuima' nequi cuana, miquea eshiye mesejo jjahuanauqui majje miyaya quea pame aña. Eshiye mese mi huana majje ca ca miyaya quea pame nee nee aña. E'e, miya Jesosajo nei jjashahuabaqui sa poani.

### *Pabaja esohui e'ahuemanojo*

<sup>39</sup> Epeeji cuana, jiquio esohui eyaya tehueaña Jesosaja epeeji e'ahuemanoja ebajji jama ba'a: Epona, ¡miqueahue eshe nequijo, onijje tii anicue! ¡A'a oya hueijji! ¡Miqueahue mano'yajo oe pea dejjajo jjahueaqui'yocue ca jjahueaqui'yo sa po majje! ¡Jesosaja epejjijo oe jjahueaqui'yocue, epona cuana! <sup>40</sup> Jamatii ecuea ejjashahuabaquiiji e'ahuemanojo jama ba'a: Miqueahue mano'yajo, ¡mee nei anicue, ahuema'ani jama! Jamaya miya quea bihui nee nee poaje'yo. Edojjoshahua

Pameya eya jjashahuabaqui meesahua canijo, ecuea esohui e'e nei.

## 8

*¿A'a bobi eshahuaja e'ijjiajji nisho ba'ehuanasohua majje ijia cajji?*

<sup>1</sup> Yahuajo miquianaaya ecue bajji tehuenaje. Jama huohui'ajjame nequiaa iña anaje ba'a: — ¿A'a noe eyacuiñajji nishoja e'ijjiajji nisho, eshahuaja e'ijjiajji nisho pea'ai ba'e huanasohua majje ijia cajji? ¿A'a e'ijjiajji pojjeama pojja'a? — eya huohui'ajjanaje nequiaa.

Jamajjeya jjeya eyaya miquianaya saja'aje jama ba'a: Pea cuaa bobi edahua'yo quia cani eyacuiñajji nisho huasijje, eshahua cuana huasijje pojja'a onijje ejjapeequijji, mase'ama epo meejji. Beca cuana jama poani ba'a: —Ecuanaja eba epana'yo acui ejuhui'yo, meshi epana'yo pea'ai, Eyacuiñajji pojjeama. Jamajjeya maya bobi ijia ca'yojji.

E'e jojo nei. Jamatii jamaya poanijo miquea ejjashahuabaquijji quea pame pishana. Ojjaña miya ojjaña ba epo poso poanijo quea pame pojjeama poaje. Pea ejjashahuabaquijji quea pame nee nee jama ba'a: —¡Pea epeejji cuana ejja'asahuaqui quea pame nee! ¡Quea jaji nee ejjapo meequi!

<sup>2</sup> E'e jamaya quea pame. Pea cuana jama jjashahuabaquiani ba'a: —Jamatii ecuea eba nei nei quea huiso.

Jamaya jjashahuabaquianijo oya quea ja'a jjashahuabaqui jjima. <sup>3</sup> Quea Eyacuiñajji jea nee

poanijo ca ca, ojaya eba eseya ojaya epeeji nei poani.

<sup>4</sup> Jamajjeya jjeya eyaya miqianaya huohuije bobijo, ma eshahua huasijje, eyacuiñajji nisho huasijje quia canijo. Quia majje pea cuaa bobi ijia cani. Eseyaya eba eyacuiñajji nisho acui ejuhui'yo, meshi epana'yo pojja'a, Eyacuiñajji e'e nei pojjeama. Eyacuiñajji e'e jojo nei oe nei yani. Jamajjeya bobi eyacuiñajji nisho huasijje quia majje eshahua e'ijiajji nisho ba'ehuanasohua ijia ca'yojji eseyaya. Jamaya quea mimishi poani pojjeama. <sup>5</sup> Pea cuana ca ca jjashahuaba quehuaquiani jama ba'a: —Eyajo, meshijo cuana pea'ai quea huiiso eyacuiñajji yani.

Jamaya jjashahuaba quehuaquianijo quea huiiso cuaa eyacuiñajji nishojo chaco cani, eshahujajo pea'ai. E'e, acui ejuhui'yo, meshi epana'yo pojja'a, eshahua pojja'a, emeshi mese pea'ai Eyacuiñajji poso acani pea cuaa. <sup>6</sup> Eseyaya ca ca eba Eyacuiñajji oe nei yani. Oya esejaya Chii ai. Ohuaya ohuaye nei ojjaña aquiana cuana pana ca'ya poa. Eseyaya onijje jjapeequiani, ojaya esohui shajja'ajjaña pea'ai. Jesosa Quito esejaya Emeshi Mese oe nei poani pea'ai. Yahuajo nei Eyacuiñajjiya Jesosa Quito nijjeya ojjaña pana ca'ya poa. Nequi mee cani pea'ai. Jesosa Quitohua eseyaya ba'e mee cani pea'ai, ojaya epeeji nei cuana.

<sup>7</sup> E'e jojo nei Eyacuiñajji oe nei yani esejaya Chii ai. Jamatii jamaya Jesusaja epeejjija ba jjima beca cuanaja. Yahuajo Jesosa Quito ba jjimahuajo onaaya bobi edahua'yo eshahua quea bhui po mee'yojji ijia canaje quea



huiso. Jjeya ma bobi ijia majje oya cuana quea mete nee jjashahuabaquiani jama ba'a: —¡Dee! Eya eshahuaja epeeji jayojja jama poani o'oya. Quea mimishi poani —jamaya eshahuajo jjashahuabaquianijo, e'e, oya cuana quea mimishi poani.

<sup>8</sup> Miquianaya quea quehua jjashahuabaquiani jama ba'a: —Eyacuiñajji ecuanajo quea bihui nee pojjeama poaje, ca ojjaña bobi ijiañajo. Eyacuiñajji ecuanajo quea bihui nee pojjeama poaje, ca ecuaa pea bobi ijia ajjajo —poani beca cuana.

Chojja. Eyacuiñajji ese nijje quea bei poani Jesosa nijje jjapeequianijo, bobi ijiañajo pojjeama.

<sup>9</sup> Epeeji cuana, ¡shajja'ajjacue mo! Miquianaya quea jjashahuabaqui ja'a. Jamajjeya bobi eshahuaja e'ijiajji nisho eba'ehuanasohua ijia majje miquianajaya eba jamaya poani quea mimishi pojjeama. Jesosaja epeeji ca'a'ama cuana ca ca quea jjashahuabaqui ja'a pojjeama quea mimishi po o'oya mee chana'. <sup>10</sup> Jama po chana' ba'a: Miya eyacuiñajji nishoja equijo bobi ijia ani ba majje ohuaya ijia caje pea'ai pojja'a. Ijia'ijia ani, oya jjashahuabaquiye eyacuiñajji nishojo, eyacuiñajji nisho bihuia cani poso oya quea ja'a pojjeama poaje. <sup>11</sup> E'e, mi ba majje mi jayojja jama ma bobi ijia majje oya quea mete poaje: —E'e, eya eshahuaja bobi ijia majje quea mimishi po o'oyanaje —poso jjabaquiye.

Jamajjeya Eyacuiñajji onijje quea quene poaje poso oya quea yeno poaje. Oja mimishijo Jesosa Quito mano'yonaje pea'ai. Oya mique chahua jama. Jamajjeya jaya quea yeno po chanajo a'a

maya noe ijjiiajji! <sup>12</sup> Miquianaya Jesusaja epee-  
 jji cuana quea ja'a poani. Jamatii pea epeejji  
 ja'a'ama quea bicho, quea mete poani mi jayo-  
 jja jama po majje. Jamajjeya miyaya oya quea  
 mimishi po meenaje. Jamajjeya Jesosa Quitohua  
 miya ba cani ona mimishi po meeji jayojja, quea  
 mimishi pea'ai. <sup>13</sup> ¡Bacue, oe! Pea epeejji quea  
 mete, quea mimishi pea'ai poani eya maya noe  
 ijjiiaña ba majje, eyaya maya noe e'ijjia o'oyajji po-  
 jjeama nei nei. Jamajjeya Jesusaja epeejji ja'a'ama  
 quea mimishi epo meeji pojjeama nei nei. ¡E  
 jayojja jama pocue; Jesusaja epeejji ja'a'ama a'a  
 quea mimishi po meeji!

## 9

*¿Achajja ba'e cajji Jesusaja huoojea'yo esohui huohuijji?*

<sup>1</sup> Ecuea epeejji cuana Conitojo ba'e, eya ca iña  
 e'e jojo nei Jesusaja huoojea'yo oja esohui huohuijji.  
 Dejjaja huoojea'yo pojjeama iña iquio. Je-  
 sosaja epeejji quea ja'a nee ba'e meesahua sa ña  
 nei nei. Yahuajo eyaya Jesosa banaje, esejaya  
 Emeshi Mese nei. Esohui quea pame nee ojo  
 eyaya huohuinaje miquiana huasijje. Shajja'ajja  
 majje miquianaya ojaya epeejji poanaje. Maya  
 miquianajaya eba. <sup>2</sup> Jamajjeya e'e pojja'a pea  
 cuana jama poani ba'a: —Pabo Jesusaja huoo-  
 jea'yo pojjeama —poani.

Jamatii miquianajaya eya eba Jesusaa huoo-  
 jea cani. E'e, miquianaya ojaya epeejji poanaje  
 eya huohuiajje. Jamajjeya quea huiso jama

poani ba'a: —Conitojo ba'e cuana Jesusaja epee-  
jji poanaje Paboja esohui shajja'ajja majje. Ja-  
majjeya esejaya eba Eyacuiñajjiya Pabo huoojea  
canaje; ohuaya Pabo esohui huohui meesahua  
cani tii —poani cuana.

<sup>3</sup> E'e, beca cuaa eya niñeba cani jama ba'a: —  
Pabo ca jja ca oma Eyacuiñajjiya huoojea'yo poj-  
jeama.

Jamaya poajo, eyaya saja'aña jama ba'a: —  
Jesusaa ecuana huoojea ca'yonaje ojaya esohui  
huohuiya —saja'ame ña.

<sup>4</sup> E'e, eya Jesusaja huoojea'yo ojaya esohui  
huohuijji. Jamajjeya eyaya miquea bobi ijjiaje  
sosema', eya sohuihuohuiaña sosejje. Jamatii eya  
jamaya po ajja nei nei. <sup>5</sup> Jesusaja esohui huohuijji  
cuana, oja chahua mese pea'ai ca ca ehuanase  
cuana nijje poquiani esohui huohuiya. Jamaya  
poani Peno pea'ai. Jamaya quea pame nee. Eya  
jamaya po sa po majje quea pame poaje, ca ehua-  
nase Jesusaja epeejji poanijo. <sup>6</sup> Ojjaña Jesusaja  
huoojea'yo esohui huohuijji cuana esohuijo nei  
chacochacoani tii, bobi yajjijo chacochaco ajja.

¿A'a ecuaaya oeyaya Benabe nijjeya cacha-  
coahua bobi sosejje? ¿A'a ecuaaya oeyaya ca-  
sohuihuohuiahua sosema'? ¿A'a jamaya quea  
pame? Eya ca ca jamaya poani ba'a: —Chojja;  
ecuanaya pea'ai casosequia cahua esohui huo-  
huiaña sosejje —poani eya.

<sup>7</sup> ¡Bacue! Emeshi meseja huoojea'yo, ona oja  
esohui shajja'ajja meejji poani ohuaya sosequia  
cani ojo chaco canaje sosejje. Oya jayojjaya e'acui  
yiye meseya acuijjajja ijji cani acui yiye chaco  
canaje sosejje. Ana'ai jaahunajjiya tojjo na ishi

cani jaahuana sosejje. <sup>8</sup> Jiquio ecuea esohui etehue'yo jayojja jama ojjaña poani. Jamaya ojjaña eba. Jamajjeya ecuana pea'ai cabobia cahua cuaa Eyacuiñajjija esohui huohui sosejje. <sup>9</sup> Eyacuiñajjiya Moisesi yahuajo nei nei jama tehue meeme aca poa ba'a:

“¡Ana'ai chacochoanijo bobiacue! Eso' quishihuojo poequiya tii ca'ijjia cahua; ¡a'a naba huoshojji!”

Jamaya yahuajo nei Eyacuiñajjiya tehue mee ca poa. Ohuaya Moisesi jamaya tehue meeme aca poa ana'aijo nei pojjeama jjashahuabaquianijo. <sup>10</sup> Ohuaya esejo jjashahuabaquianijo pea'ai jamaya tehue mee ca poa. Oya jayojjaya que chacojji cuana, anoso sejjajji pea'ai chaco majje jama jjashahuabaquiani ba'a: —Eyaya anoso sejjaja sosejje quijje yeje'yo ecuea equijo e'ijjiajji.

<sup>11</sup> Jiquio ecua chacochojjiya jayojjaa ecuaaya miquianaya sohuihuuinaje. Shajja'ajja majje Jesusaja epeeji poanaje. Jamajjeya jjeya ecuana bobi quiaje esohui huohuinaje sosejje miquianaya quea pame nee poaje. <sup>12</sup> E'e, pea esohui huohuijji sohuihuohui majje jama poani ba'a: —¡Ecuaa miquiana sohuihuohuinaje sosejje bobi, aquiana pea'ai che ecuana quiacue! —poani pea esohui huohuijji.

Jamaya quea pame. Ecuaya ca ca quea huiso nee esohui quea pame nee Jesusaja huohuinaje miquianajaya eshajja'ajjajji. Sosema'. Jamatii ecuanajaya miquianaya jama ajjima ba'a: —¡Aquiana mo che quiacue eya esohui huohuinaje sosejje! —ajjima ecuanajaya.

Chojja. Jamaya e'a jojjemo Jesusaja epeeji pojjeama siajje pome jama ba'a: —Pabohua ca jja ca esohui huohui cani quea huiso aquiana sosejje. Jamajjeya ecuana shajja'ajja sa po ajja —siajje pome.

Jamajjeya eya aema' jayojja jama ba'yani; esohui huohuiaña sosema' ojjañaja eshajja'ajjaji.

<sup>13</sup> Yahuaño nei nei Eyacuiñajjiya jama aca poa ba'a: —Jodio dejja cuaa Eyacuiñajjiya equijo chaco majje bobi Eyacuiñajji yasijje onaja quia ijia ca poa sosema'. Jodio etii cuaa Eyacuiñajjiya equijo huo dahua ca poa Eyacuiñajji quea bei epo meejji. Ma huo dahua tehuejea jjimahua ijia ca poa Eyacuiñajjiya equijo chaco cani sosejje.

Maya miquea eba. <sup>14</sup> Oya jayojjaya esejaya Emeshi Mese neiya Jesusaa huohui canaje ojaya esohui huohuijji cuanajo jama ba'a: —Sohuihuohui canijo, ¡sose quiacue ecuea esohui huohuijji! —poa.

<sup>15</sup> Jamatii eya jamaya epojji pojjeama nei nei. Esohui huohuinaje sosejje bobi edojji pojjeama. Jjeya esohui tehueaña miquiana huasijje miquea bobi equia meejji pojjeama. Bobijo pojjeama eyaya esohui huohuiaña. Eyaya Jesosa Quitoja esohui huohui tiitiije sosema' miquianaya. <sup>16</sup> Eyaya ehuhuijji pojjeama jama ba'a: —Eyaya ca eya Jesusaja esohui quea pame huohuiaña; jamajjeya eya quea pame nee.

Chojja. Eyacuiñajjiya eya huoojea ca'yonaje Jesusa Quitoja esohui huohuiya. Esohui huohui ajja jjemo eya quea yeno nee nee pome, Eyacuiñajjiya eya quea nee nee po mee came pea'ai. <sup>17</sup> Eyaya

jamatii ecuea ejjashahuabaquijji jayojja jama esohui huohuiaña jojjemo jama huohuime ba'a: — ¡Sosequiacue mo esohui huohuiaña sosejje! — ame.

Yahuajo eya jjashahuabaqui jjima Jesusaja esohui huohuijji. Chojja. Eyacuiñajjiya eya huoojea ca'yonaje ojaya esohui huohuiya. Eyaya ojo sosema' jayojja quea bihui nee chacoaña. <sup>18</sup> ¿Ae sa poani eya esohui huohuiaña sosejje? Eya bejjo, bobi pea'ai sa po ajja esohui huohuiaña sosejje. E shajja'ajjajji huohui jjima jama pea'ai ba'a: — ¡Che mo bejjo quiacue eya esohui huohuiaña sosejje! — jamaya ecuea ajjima.

Chojja, eya quea bihui nee Jesusaja esohui quea pame nee huohuiaña sosema'. <sup>19</sup> Chama' dejja e huoojea'yojji esohui huohuijji. Chojja. Jesosa nijje chaco sa poanijo eya chacochoani. Ojjaña yajjijo chacoaña. E'e, eyaya esohui huohuiaña ojjaña Jesosa nijje ejjapeequi meesahuajji. <sup>20</sup> Jamajjeya Jodio cuana nijje ba'yanijo, o jayojja jama ba'yanijo eya Moisesija etehue'yo jayojja jama aña pea'ai. Jamajjeya ohuaya ecuea esohui Jesosa Quitojo shajja'ajja caje'yo pojja'a. Moisesija etehue'yojo jjamimicuijja nobiajjaequi ajja onijje. <sup>21</sup> Oya jayojjaya Jodio pojjeama cuanaja Moisesija etehue'yo ba jjimajo, eyaya onijje nequiya ohuaya jayojjaya jama aña. Moisesija etehue'yo huohui ajja. Chojja. Eyaya esohui quea pame nee Jesusaja huohuiaña ona Jesosa nijje jjapeequi meesahuajji. Jamajjeya Jesusaja esohui jama po majje Eyacuiñajjija ejjashahuabaquijji jama aje pea'ai. Eya ca ca Eyacuiñajjija esohui jayojja jama ba'yani tii, shajja'ajjaña tii tii, Jesosa Quitoja. Jamajjeya Eyacuiñajji quea bihui nee poani enijje.

<sup>22</sup> Jesusaja epeeji quea jjashahuabaqui ja'a pishana nijje ba'yanijo eya o jayojja jama poani, Jesosa nijje ejjapee neinei qui meesahuajji. E'e, Jesosa nijje ejjapeequi meesahuajji eyaya ojjaña joya e pejejo ba'e nijje jjapeequiani. Eyaya aje oe ojjaña pea cuana Jesusaja epeeji quea ja'a po meesahuaña.

<sup>23</sup> Jamaya eyaya aña ojjaña cuana esohui quea pame nee Jesosa Quitojo eshajja'ajja meejji. Jamajjeya eya quea bihui nee jjapeequiani Jesusaja epeeji eyacua cuana nijje.

<sup>24</sup> ¡Jashahuabaquicue esho'iquiana quebanei poanijo! Ojjaña cuajicuajiani aquiana iñajji sosema'. Oe esho'i quea cuejipashi nee nee ebionei poeje. Oya oe nei iña mee caje aquiana sosema'. Jiquio ecua esho'iquiana quea cuejipashi nee cuajicuajiani aquiana iñajji jayojja jama ¡miquianaya Jesosa Quito nijje jjapeequicue quea pame nee nee! ¡Ojaya esohui jama acue! Jamajjeya quijje ohuaya miquianaya quea pame nee ba'e tiitii mee caje'yo. <sup>25</sup> Ojjaña esho'i cuana janobajjima nei cuajicuaji huicha'a huicha'ani, jjashahuabaquiani quea cuejipashi nee epojji, aquiana e'iñajji. Jamatii ma aquiana quijje pishana chama'yo tii poaje'yo. Jesosa nijje jjapee neinei quiajo ca ca quijje ohuaya eseya quea pame nee nee sosequia caje'yo, eba'eji quea pame nee nee epo tii tiiji. <sup>26</sup> Jamajjeya eya Jesosa nijje jjapee neinei quiani. Jjashahuaba tiitiquiani. Eya poqui ajja cojjama' jama; dejja ehoo jama poqui ajja, eya. Ecuea eba Jesusaja esohui quea pame nee nee. <sup>27</sup> Jesusaja epeeji quea pame nee, quea ja'a nee epojji eya jjashahuabaquiani quea huiso.

E'e, ojaya esohui huohui huicha'a huicha'a majje eya quea bicho nee nee pome Jesusaja epeeji pame'ama po majje. Jama poajo Jesosa Quitohua quijje eya esosequia'yojji pojjeama. Eya ba caje ohuaya epeeji quea mimishi.

## 10

### *¡Etiiquiaa jayojja a'a eyacuiñajji nisho aji!*

<sup>1</sup> Ecuea epeeji cuana, jiquio esohui shajja'ajjacue! Yahuajo nei nei ecuanaja etiquiana Moisesi nijje meshi jabojo poquianijo, Eyacuiñajjiya jaahuana ca'ya poa. Eyajo ona biajje bo ai nequi mee ca'ya poa eshequiya edahua ca poani jjejojo. Poquianijo bae huo'o huasijje poe'yanaje; bae yiyesamajje ejiojji quea jabo nee po mee majje, ojjaña tii ojee ojje miji yasijje poqui meesahua ca'ya poa quea pame nee ejiojjijje. <sup>2</sup> Yahuajo nei bo quimejjeje poquianijo, bae huo'o ojje miji yasijje poquianijo pea'ai ecuanaja etiquiana Moisesija esohui shajja'ajja ca poa. Jamajjeya onajaya emeshi mese po'ya poa Moisesi. Oya jayojjaya jjeya eseya enajo besa mee cajje Jesusaja esohui jayojja jama eba'ejji. <sup>3</sup> Yahuajo nei meshi jabojo Eyacuiñajjiya bobi pahui jayojja oque mee ca'ya poa meshi yasijje ojjaña etiquianaja e'ijjiajji. <sup>4</sup> Ena chama' poajo, Quitohua ena jamatii cuaya meequi ca'ya poa bajjoojje etiquianaja e'ishijji.

Jamajjeya Quitohua ojaya epeeji cuana jaahuana cani. Etiquiana Quitojo jama poa ba'a: —Oya ecuana nijje poquiani, de; ohuaya ecuana



jaahuana cani. Jamajjeya ohuaya bajjoojje ena cuaya meequi canaje —poa.

<sup>5</sup> Jamatii aje oe beshahua nei ojjaña ecuanaja etiiquiiana quea mimishi po tiitiia poa. Eyacuiñajji bihuia jjima aca poa. Eyacuiñajji quea quene ona nijje poa. Jamajjeya beshahua nei ojjaña mano ca'ya poa meshi jabojo tii.

<sup>6</sup> Eyacuiñajjiya etiiquiiana quea mimishi nee nee mano mee ca'ya poa ese jjabahuejjaquiji, mimishijo quea mete epojji. Jamajjeya mimishi cuana a sa po ajja poaje'yo eseya. <sup>7</sup> E'e, ecuanaja etiiquiiana eyacuiñajji nisho nijje, acui ejehui'yo nijje, eshahua nijje pea'ai mimi ca'ya poa. Eyacuiñajjiya esohui yahuajo nei etehue'yo jama poa ba'a:

“Yahuajo oya cuana ijia'ijia majje, ishi'ishi majje pea'ai majamaja ca poa eshahua nijje jjapeequianijo”.

Jamaya yahuajo poa.

¡A'a ona jayojja jama quea mimishi pojji eshahua nijje! Jamaya quea tai. <sup>8</sup> Etiiquiiana cuana aje oe onaja ehuanasejo jaanaje, onaja yahuejo jaanaje. Quea mimishi nee nee poanijo, Eyacuiñajjiya oya cuana quea huiso nee nee, 23.000 mano mee ca'ya poa oya pojjajo tii. Jamajjeya ja'a jja oe ona jayojja jama pojji! ¡A'a onajaya ehuanasejo, yahuejo pea'ai ba'eji! <sup>9</sup> Ecuanaja etiiquiiana cuana jjashahuabaquia poa jama ba'a: — Ecuanaja quea mimishi poajo, e'e pojja'a Eyacuiñajji quene'ama poaje ecuanaja mimishi cuanajo — jamaya poa, de.

Chojja. Quea mimishi poajo, Eyacuiñajjiya peyo cuana huoojea ca poa ona ijiaa. Jamajjeya jeti-

iquiana jayojja jama a'a pojji! <sup>10</sup> Ecuanaja etiquiana cuaa Eyacuiñajji niñeba ca poa. Jama poa ba'a: —Eyacuiñajjiya ecuana quea pame nee ejaahuanajji pojjeama —aca poa.

Eyacuiñajji niñeba canijo, ohuaya ojaya esohuidojojji quea ca'a cuana huoojea ca'ya poa o niñebajji cuana mano mee'yohua. Jamajjeya jetiquiaa aca poa jayojja jama niñebame a'a ajji Eyacuiñajji!

<sup>11</sup> ¡A'a pajea'yojji! Ecuanaja etiquiana quea mimishi poaninajejo mano ca'ya poa yahuaajo nei. Jamaya Eyacuiñajjiya amajje esohui tehue mee ca poa esejaya ebajji. Jamajjeya jjeya ba mee cani e'e jojo nei oya quea quene poaje esejaya mimishijo. Jesosa Quito pojja'a jjeya poeje o'oya. ¡Jamajjeya etiquiana quea mimishi nee nee poa jayojja a'a pojji!

<sup>12</sup> E'e pojja'a beca cuana quea quehua jjashahuabaquiani jama ba'a: —Eya quea pame nee poanijo eshahuaa eya quea mimishi epo meeji pojjeama.

Chojja. ¡Jamaya jjashahuabaquicue ba'a: —Eyacuiñajji, ¡eya quea pame po meesahuacue! ¡Nahue neineicue mo; quea mimishi a'a po mee o'oyajji! —jamaya Eyacuiñajji nijje mimicue!

<sup>13</sup> Eshahuaa ojjaña quea mimishi po mee sa acani. Ohuaya miquianaya quea mimishi po mee sa acani. Jamatii Eyacuiñajjiya miquianaya epajea'yojji pojjeama. Ohuaya miquianaya ojaya epeeji quea pame nee po mee canijo, eshahuaa miya quea mimishi epo mee'yojji pojjeama. Beshahua nei quea mimishi po mee canijo, ¡Eyacuiñajji nijje mimicue: —Jesosa, ¡eshahua quea

huesha nee huojeacue! ¡Eya quea pame po meecue mimishi'ama epojji! —jamaya pocue!

*Jesosaja bobi ijiañajo ja'a eshahuaja epeeji jama pojji!*

<sup>14</sup> Jamajjeya ecuea epeeji cuana, jeshahuaja epeeji cuana nijje a'a jjapeequijji! ¡Onaya eshahua nijje mimiani yasijje a'a poquijji! ¡Epana'yo cuanajo a'a jjashahuabaquijji pea'ai! <sup>15</sup> Ecuea eba miqúanaya quea jjashahuabaqui ja'a nee poani. Jamajjeya jecuea esohuijo jjashahuaba neineiquicue, quea ja'a nee! <sup>16</sup> Eseyaya Jesosaja bobi ijiaña oya esejaya mimishijo mano'yonaje pajea'yo jjima yajji. Jesosaja bobi ijia jjimahuajo, oja ena ishi jjimahuajo pea'ai eseya Eyacuiñajji nijje emimi jama ba'a: —Eyacuiñajji, miya quea pame nee nee.

Ma ena ishi jjimahuajo Jesosa Quitoja ena' ecuaya'yojo eseya ejjashahuabaqui jama ba'a: —Jesosa mano'yonaje ecuea mimishi cuijea'yojji sosejje —jamaya jjashahuabaquime epo.

Pahui ijia jjimahuajo eseya ejjashahuabaqui Jesosa Quitoja yamijo jama ba'a: —Jesosa Quito eseya ojaya epeeji quea pame nee epo meeji sosejje mano'yonaje.

<sup>17</sup> Pahui mijisisi jjimahuajo oe pahui yani. Es-eya Jesosaja epeeji cuana quea huiso. Jamatii pahui oe jayojja jama eseya poani. E'e, eseya ojee nequianijo eseye nei jayojja nequiani Jesosa Quito nijje nei jjapeequianijo.

<sup>18</sup> ¡jjashahuabaquicue ecuanajaya etiiquianajo, Jodio cuanajo! Oya cuana yahuaajo nei jama poa

ba'a: Eyacuiñajji nijje emimijji cuaa noe Eyacuiñajji yasijje equia'yo dahua ca poa. Noe dahua tehuejea jjimahua ijia caninaje Eyacuiñajji nijje jjapeequianiya jjejojo. <sup>19</sup> ¿Ajeo acuae eyaya miquiana jama huohuiaña, ae ba meesahuajji? Jama ba'a: Bobi eyacuiñajji nisho huasijje quia majje dejja cuaa jamatii ijia cani. Eyacuiñajji nisho eshe pojjeama, Eyacuiñajji e'e jojo nei pojjeama, de. <sup>20</sup> Jamatii eshahuaaja epeeji cuaa bobi quia cani eyacuiñajji nisho epana'yo huasijje pojjeama. Maya eshahua cuana huasijje quia cani. Jamajjeya oya cuana Eyacuiñajji e'e jojo nei nijje jjapeequi ajja. Miquianaya Jesusaja epeeji cuana, ja'a eshahuaaja epeeji jayojjaa jama ajji! ja'a eshahua cuana nijje pojji! <sup>21</sup> Jesosa Quito nijje jjapeequianiya jeshahua cuana nijje a'a jjapeequijji! Pea oya, de. Jamajjeya Jesusaja ena ishianajo, oja bobi ijianajo pea'ai j bobi eshahua huasijje equia'yo a'a ijia pea'aijji! <sup>22</sup> Eshahua cuana Eyacuiñajjija boti'ama nei nei. ja'a esejaya Emeshi Mese nei Eyacuiñajji quea quene po meeji eshahua nijje jjapeequianijo! ¿A'a miya quea ca'a nee poso jjabaquiani? ¿A'a ya Eyacuiñajji ca'a'ama poso aña? Jamajjeya Jesosa nijje jjapeequiani ja'a eshahuaaja epeeji po pea'aijji!

<sup>23</sup> Jesosa Quitoja epeeji beca cuana jama mimi-ani ba'a: —Eya Jesusaja epeeji poanijo ojjaña bobi, epana'yo huasijje quia'yo pea'ai ijia majje quea mimishi pojjeama poani —jamaya poani.

E'e jojo nei. Jamatii eyaya miquianaya saja'aña jama ba'a: —Chojja. Ma bobi ijia majje quea pame pojjeama poani. Maaya ojjaña Jesosa nijje jjapeequi meesahua ajja. Miquianaya

jama jashahuaba quehuaquiani pea'ai ba'a:  
—Ecuaya ojjaña aje mimishi'ama poanijo.

Eyaya ca ca miquianaya huohuaña jama ba'a:  
—Ojjaña quea pame pojjeama e'ajji. ¡Jesosaja epeeji quea ja'a pojjeama cuana quea mimishi po mee o'oya chana! <sup>24</sup> Jamajjeya a'a quea quehua jashahuabaquiji jama ba'a: —Eyaya ojjaña bobi jjesheje ecuea e'ijji <sup>24</sup> —jamaya poanijo miquianaya Jesosaja pea epeeji cuana jashahuabaqui ajja.

Chojja. ¡Jashahuabaquicue pea cuana Jesosa nije ejjapeequi meesahuajji quea ja'a nee! <sup>25</sup> Jamajjeya noe edahua'yo jjesheañajo ja'a huohui'ajjaji jama ba'a: —¿A'a jiquio noe edahua'yo eshahua huasijje quia? —a'a jamaya huohui'ajjaji!

Jamajjeya ¡miyaya maya ijjiacue quea bihui nee, mete'ama! <sup>26</sup> E'e, Eyacuiñajji esohui etehue'yo jama poa ba'a:

“Eyacuiñajjiya ojjaña meshi cuana pana ca'ya poa.

Ojjaña aquiana pea'ai pana ca'ya poa. Jamajjeya ojaye nei meshi, aquiana pea'ai, ojjaña”.

Jamaya poa yahuajo nei.

<sup>27</sup> E'e pojja'a Jesosaja epeeji pojjeamaa miya iyaa caje ojaya equi yasijje bobi ijji. Jamajjeya ojaya equi yasijje poqui majje ¡bobi ijjiacue mete'ama! ¡Ijji'ijjianiyo ja'a huohui'ajjaji jama ba'a: —¿A'a jiquio noe edahua'yo eshahua huasijje quia? —a'a huohui'ajjaji! ¡Jamatii ijjiacue mete'ama!

<sup>28</sup> Jamatii ojee ijji'ijjianiya, pea eseja epeejiya miya jama huohui caje pojja'a ba'a: —Jiquio bobi

eshahua huasijje quia —jamaya acajje ¡a'a maya bobi ijjiájji! Ma bobi quea pame nee e'ijjiájji. Jamatii miya Jesusaja epeeji neiya ma bobi ijjiáña ba majje esejaya epeeji quea yeno poaje pojja'a. ¡A'a oya quea yeno, quea bicho po meeji! <sup>29</sup> E'e, miya Jesusaja epeeji quea pame poaniya ijjiáje mete'ama. Jamatii mi ba majje Jesusaja epeeji quea ja'a pishana quea mete po chana' miyaya ma bobi ijjiájo. Jamájjeya ¡a'a ijjiájji! ¡Oya quea bei po meecue; miya pea'ai quea bei pocue!

E'e pojja'a beca cuaa huohuí caje jama ba'a: —Eyaya Jesusaja epeeji poaniya ojjaña bobi ijjiáña mete'ama —acaje.

Eya ca ca jama po ajja. Pea cuana quea jjashahuabaqui ja'a pojjeamajo quea mete poanijo, eyaya ojjaña bobi ijjiá ajja.

E'e pojja'a onaaya jama acaje pea'ai ba'a: <sup>30</sup> —E'e, eyaya Eyacuiñajji bihuiaña ojjaña bobi ijjiá jjimahuajo. Jamájjeya eyaya ojjaña bobi ijjiáña mete'ama. Bobijo eyaya Eyacuiñajji bihuiaña; jamájjeya ¡a'a enijje mimijajijji eya ojjaña bobi ijjiáñajo! —jamaya acaje pojja'a onaaya.

<sup>31</sup> Jamájjeya ¡jiquio esohuí bacue! Miyaya bobi ijjiáñajo, e'ishijji ishiañajo pea'ai ojjaña miquea eba'ejjijo pea'ai jjashahuabaquicue jama ba'a: —Eyaya ojjaña cuana Eyacuiñajji bihuia mee sa año.

<sup>32</sup> Jamájjeya ¡quea ja'a nee ba'e tiitiicue! ¡A'a esejaya epeeji cuana quea mimishi po mee o'oyajji! ¡Jodio cuana, Jodio pojjeama, Jesusaja epeeji cuana pea'ai a'a quea mimishi po mee o'oyajji! ¡E'e, quea ja'a nee ba'ecue ojjaña cuana Jesosa nijje quea ja'a nee ejjapeequi meesahuajji! <sup>33</sup> ¡E jayojja jama pocue! Eya jjashahuabaquiani ona quea bei

po meesahuajji. Eya jjashahuabaqui ajja jama ba'a: —¿Ae shai ejo quea pame?

Eyaya ca ca ojjaña quea bei po mee sa aña. Jamaya eyaya aña ojjaña Jesosaja epeeji epojji.

## 11

<sup>1</sup> Eyaya Jesosa Quitoja esohui jayojja jama aña. ¡Jamajjeya e jayojja jama pocue miquianaya!

### *Esohui Eyacuiñajjija equi yasijje dobiqianijo*

<sup>2</sup> Ojjaña pojjaño miquianaya ejo jjashahuabaquiani. Ecuea esohui jayojja jama po tiitiani, miquianaya. Jamaya quea pame. <sup>3</sup> Jamatii ¡ecuea esohui etehue'yo ba

neineicue yahue cuana, ehuanase cuana pea'ai! Yahue cuana ojaya ehuanase huoojeajji poani. Jesosa Quito ojjaña huoojeajji poani tii, dejja cuana huoojeajji poani, ojaya epeeji cuana huoojeajji poani. Ojaya Chii Eyacuiñajji eyajo ani Jesosa Quito huoojeajji poani pea'ai.

<sup>4</sup> Jamajjeya dejja cuana, Eyacuiñajjija equijo nequi onijje mimianijo, oja sohui huohui canijo pea'ai ¡ejaahuojja cajjajea'yocue! Jaahuojjajjiya Eyacuiñajjija esohui huohui canijo Jesosa Quito cajaa ajji jayojja jama poani. <sup>5</sup> Epona cuana ca

ca Eyacuiñajjija equijo ani onijje mimianijo, ojaya esohui huohui caqui pea'ai ¡jjasapataquicue! E'e, epona jjasapataqui ajjajo oja yahue cajaa ajji jayojja jama poani. Jamajjeya jjasapataqui ajjajo esao cobojea majje jayojja jama poani, quea bicho poani. <sup>6</sup> E'e, eponaa jjasapataqui ajjaa jjejojo cacobojea cahua. Jamatii epona esao cobojea majje quea bicho nee nee poaje. Jamajjeya

bicho'ama epojji epona cajjahuojja taquiahua Eyacuiñajjija equijo mimianijo.

<sup>7</sup> Dejja cuaa, Eyacuiñajjija epeejiya ejaahuojja iya ajja Eyacuiñajjija equijo esohui huohui canijo. E'e, Eyacuiñajji dejja cuanajo jama poa ba'a: — Dejja cuana ojjaña e'aquiana mese poaje ojjaña aquiana meshijo ani. Jamaya Eyacuiñajjiya ojjaña ba mee caje ohuaya dejja pana ca'ya poa quea pame nee oya jayojja jama epojji. Jamajjeya ¡a'a epona jama pojji! ¡A'a jjahuojjataquiiji nequiana dejja! Oya jayojjaya epona oja yahueja esohui jayojja jama acani oja yahueja yajji. <sup>8</sup> Eyacuiñajjiya dejja ebionei pana coo ca'ya poa. Dejja pana majje quijje epona pana ca'ya poa dejjaja edojjorjanijji sa'. <sup>9</sup> Eyacuiñajjija dejja pana jjima eponaja yajji. Chojja. Epona pana ca'ya poa dejjaja yajji. Dejja epona huoojeajji poa. Jamaya Eyacuiñajjiya a sa aca'ya poa. <sup>10</sup> Jamajjeya Eyacuiñajjija esohuidojojji cuaa eseya ba canijo, epona cuana cajjahuojjataquiahua Eyacuiñajji nijje ojee mimianijo. Jamajjeya ojjaña ba cani yahue epona huoojeajji poani.

<sup>11</sup> Jamatii jjeya Emeshi Mese nei Jesosa nijje jjapeequi majje ehuanase cuaa yahue cuana ba'e meesahua cani Jesosa Quitojo. Yahue cuaa ehuanase jaahuana cani pea'ai. <sup>12</sup> E'e, yahuajo nei nei dejja pana majje quijje Eyacuiñajjiya epona pana ca'ya poa dejjaja edojjorjanijji sa', ebionei epona. Jjeya ca ca dejja sho'i cuana eponaja mejo cuayani. Jamatii Eyacuiñajjiya ojjaña pana ca'ya poa, ojjaña nei nei.

<sup>13</sup> Jamajjeya ¡jjashahuabaquicue epona cuanajo! ¿A'a ojjaña ojee Eyacuiñajji nijje mimianijo epona



camimiahua jjahuojjataqui jjima? ¿A'a jamaya quea pame nee? Chojja, quea pame pojjeama. <sup>14</sup> Ecuanaja eba dejja cuana saojji quea pame pojjeama. Epona jayojja poani, saojji. <sup>15</sup> Epona saojji ca ca quea pame nee nee. Eponaja esao ao ojaya ejjahuojja taquijji jayojja. Jamaya Eyacuiñajjija quea boti nee nee. <sup>16</sup> E'e pojja'a eponaja esao aajo, ejjahuojjataquijjijo pea'ai pea cuana jjamimicuiajea nobiajeaqui sa poani enijje. Jamatii ecuea esohui jiquio jama ba'a: Epona cuana Eyacuiñajjija equijo cajjahuojjataquiahua. Jesusaja epeejji cuaa ojjaña cuiñajjijo ba'eya jamaya huohui cani pea'ai.

*¡Pea Jesusaja epeejji cuana nijje a'a quea mimishi pojji!*

<sup>17</sup> Ecuea epeejji cuana, jjeya pea esohui eyaya tehueje miquianaja ebajji. Miquianaya Eyacuiñajjija equijo ojee anijo quea pame pojjeama poani. Ojjaña cuana Jesosa nijje quea ja'a nee jjapeequi meesahua jjima. Pea epeejji cuana ca ca quea yeno po mee año. Jamajjeya eyaya miquianaya huohuije Eyacuiñajjija equijo quea ja'a nee epojji. <sup>18</sup> Pea cuaa eya huohui canaje jama ba'a: —Jesosa Quitoja epeejji cuana Conitojo ba'e Eyacuiñajjija equijo ojee jjachichaqui majje jjamimicuiajea nobiajeaquiani. Oe pojji epeejji cuaa pea epeejji cuana nijje jjapeequi sa po ajja acani cuaa —jamaya acani cuaa.

E'e pojja'a miquianaya jamaya quea tai poani. <sup>19</sup> Jesusaja epeejji quea bei pojjeama mimicuiajea nobiajea sa poani, pea nijje jjapeequi ajja. Jamaya quea tai. Jamatii jamaya poanijo, ojjaña

ba caje ache dejja cuana Jesusaja epeejji e'e jojo nei pojjeama, ache oja epeejji e'e jojo nei ba caje pea'ai. <sup>20</sup> E'e, miquianaya ca mi ca oe Eyacuiñajjija equi yasijje dobiqiuani esejaya Emeshi Mese nei Jesusaja bobi ojee ijjiiaa poso. Chojja, Jesusajo miquianaya jjashahuabaqui ajja, oya es-ejo mano'yonajejo jjashahuabaqui ajja. <sup>21</sup> Ojee ijjiia'ijjiia ajja pea'ai miquianaya. Chojja, pea cuana ishoa ajja. Jamajjeya beca cuaa quea huiso ijjiia cani. Quea huiso ishi cani pea'ai, quea jee-nee nee poani. Pea cuana ca ca quea shoe nee poani. <sup>22</sup> Jamajjeya bobi quea huiso ijjiia sa poanijo ¡miquianajaya equijo ijjiia'ijjiia socue! ¡A'a Eyacuiñajjija equijo quea dejja tai pojji! ¡Jesusaja epeejji aema' a'a quea bicho po meeji ojaya bobi quea huiso chamajo! Eyacuiñajjija equijo quea tai añajo, eyaya ojjaña miquianaya tecueña jama ba'a: —¡Eyacuiñajjija equijo ani a'a Jesusaja epeejji quea mimishi ajji bobijo!

*¡Jesusaja bobi e'e jojo nei ijjiacue o pajea'yo jjima yajji!*

*(Mateo 26.26-29; Macoso 14.22-25; Noca 22.14-20)*

<sup>23</sup> Eseyaya Emeshi Mese neiya Jesusaa eya ba mee canaje jiquio esohui oja bobi ojee e'ijjiajjijo, oya esejaya mimishijo mano'yonaje pajea'yo jjima yajji. Maya yahuaajo eyaya huohuinaje jama ba'a: —Oe mecajje esejaya Emeshi Mese nei Jesusaja epeejji nishohua oya quia canaje dejja maseja equecua'yojji. Iña majje dojo canaje cuaa. Iña jjimahuajo Jesusaa oe pahui jjeshe canaje.

<sup>24</sup> Eyacuiñajji bihuia majje pahui mijisisi canaje.

Ojaya epeejji cuana jama huohuime acanaje ba'a: —Jiquio pahui emijisisi ecuea eyami. Eya miqúanajaya mimishi cuanajo manojeyo. Jamajjeya jiquio pahui ijjiñaño miqúanaya eya miqúanaja mimishijo manoyonaje pajeyo jjima yajji —Jesosa poanaje.

<sup>25</sup> Pahui ijji majje Jesosa Quitohua caneco jjeshe canaje. Eyacuiñajji bihuia ca o'oyanaje. Huohui canaje jama ba'a: —Jiquio ena canecojo nequi ecuea ena'. E'e, ecuea ena' cuayaquije'yo. Eya ojñaña mimishijo manojeyo. Jamajjeya Eyacuiñajjiya miqúanaya huohui caje, ma ohua miqúanajaya mimishi cuana cuijea caje'yo e manoyajo, ma oja yahuajo huohui jjima. Jamajjeya jiquio ena canecojo nequi ishianajo jjashahuaba tiitiquicue jama ba'a: “Jesosa manoyajo oja ena' cuayaquinaje ecuea mimishi cuijeayojji” jamaya acue —Jesosaa acanaje.

<sup>26</sup> Jiquio pahui, ena canecojo nequi pea'ai Jesosa Quitoja bobi poani. Jamajjeya ojee ojaya bobi ijjiñaña o shahuaba poquiajji, ma oya es-eja mimishijo manoyonaje. ¡Jamaya acue esejaya Emeshi Mese nei Jesosa Quito poe o'oya jjimahuajo! <sup>27</sup> Jamajjeya esejaya Emeshi Mese nei Jesosaja bobi, pahui ijjiñaño ojaya ena canecojo nequi pea'ai ojee ishianajo ¡a'a quea dejja tai pojji! ¡Quea nishehui a'a pojji! ¡A'a quea mimishi jjashahuabaquijji pea'ai! Jamaya poanijo Jesosa quecua'yojji jama poani miya. Eyacuiñajjiya quea nee nee po mee caje'yo. Jamajjeya quea ja'a jjashahuabaqui ajjaa ¡a'a Jesosaja bobi ijjiñajji, ojaya ena canecojo nequi pea'ai a'a ishijji! Quea

ja'a ba'yaniya ¡quea bihui nee Jesusaja bobi ijjiacue, ojaya ena ishicue pea'ai!

<sup>28</sup> Jamajjeya Jesusaja bobi ijjiia jjimahuajo, ¡ojaya ena ishi jjimahuajo pea'ai jjashahuaba neineiquicue jama ba'a: —¿A'a eya e'e jojo nei Jesosa Quito nijje jjapeequiani quea ja'a nee? —jjashahuabaquicue!

¡Majoya pahui ijjiacue, e'ishijji ishicue quea bihui nee pea'ai! <sup>29</sup> Jesosa Quitoja esohui ojaya bobijo miquea quea quehuajo ja'a ijjiajji! Jesosa mijo mano'yonajejo jjashahuabaqui jjimaa ja'a oja bobi ijjiajji! Miya ijjiajo Eyacuiñajji quea quene nee nee po chana'. Miya quea nee po mee caje. <sup>30</sup> Quea huiso miquiana nijje nequiya Jesusajo jjashahuabaqui jjima oja bobi ijjiia cani. Jamajjeya quea mano poani, beca cuana ca'a'ama poani. Jamajjeya beca cuana mano'yonaje pea'ai.

<sup>31</sup> Miquea eba'ejjijo jjashahuabaqui majje ¡mimicue Eyacuiñajji nijje jama ba'a: —¡Ecuea mimishi cuana cuijea'yocue! —jamaya acue!

Jamajjeya Eyacuiñajjiya miquea mimishi cuijea'yo majje miya etecueajji pojjeama Jesusaja bobi ijjiañaajo. <sup>32</sup> Jamatii Eyacuiñajjiya jjeya Jesusaja epeejji quea ja'a pishana quea mano, quea nee po mee cani ejjabahuejjaqui meejji, mimishi cuana epajea mee'yojji. Jamajjeya quijje Jesusaja epeejji pojjeama cuana nijje equiyo'yojji pojjeama cuaquijo eshahuaja epeejji cuana nijje.

<sup>33</sup> Jamajjeya epeejji cuana, ¡shajja'ajjacue mo! ¡Miquianaaya Jesusaja bobi ijjiañaajo ojee oe ijjiacue o shahuaba'yojji! ¡A'a mee nei ijjiia'ijjiajji; ishoa socue cuana! <sup>34</sup> Ojjaña joya quea naba taja, quea shoe pea'ai poani equijo ca ijjiia'ijjiahua Jesusaja

bobi ijia jjimahuajo. Jamajjeya Eyacuiñajji quea tecue po ajja miquiiana nijje, quea pame nee ojee Jesosaja bobi ijiañajo.

Miquea esohui etehue'yojo, quea huiso eya miquiaaya huohui'ajjanaje. Maya eyaya huohuije miquiiana huasijje poe o'oya majje.

## 12

### *Edojjoshahua Pameya eseya Eyacuiñajjijo chaco meesahua cani*

<sup>1</sup> Ecuea epeeji, miquianajaya esohui etehue'yojo eya huohui'ajjanaje miquiaaya Edojjoshahua Pamejo. Jjeya nei eyaya maya huohuije miquianajaya ebajji. Edojjoshahua Pameya eseya Eyacuiñajjijo chaco meesahua cani. Ojjaña Eyacuiñajjija ejjashahuabaquijji jayojja jama ameesahua cani. <sup>2</sup> Yahuajo Jesosa Quito nijje jjapeequi jjimahua miquianaya jjapeequinaje eshahua cuana nijje. Eyacuiñajji nisho nijje miminaje, acui ejehui'yo nijje pea'ai. Maya shajjama', nabama' pea'ai. Jamaya miquianajaya eba. <sup>3</sup> Beca cuana jama siajje pome poani ba'a: —Jesosa siajjepojji. Oya Eyacuiñajjija Bacua Ejja pojjeama —jama siajje pomeya poani.

Jamajjeya miquianajaya eba oya cuana Edojjoshahua Pame nijje jjapeequi ajja. Onijje jjapeequianijo ca ca Edojjoshahua Pameya oeyaya eseya huohui meesahua cani jama ba'a: —Esejaya Emeshi Mese nei oe nei nequi, Jesosa Quito —e'e, jamaya Edojjoshahua Pameya oeyaya eseya huohui meesahua cani.

<sup>4</sup> Edojjoshahua Pame oe neiya eseya amee cani Eyacuiñajjijo quea pame nee. Oe epeeji oe

aquiána quea pame nee Eyacuiñajjijo ameesahua caní. Beca cuana pea aquiána quea pame nee ameesahua caní. Quea huiso aquiána cuana Eyacuiñajjija ameesahua caní Edojjoshahua Pameya. <sup>5</sup> Eseyaya Emeshi Mese oe nei yani. Ojaya nei yajjijo eseyaya chacoaña. Ohuaya ojaya epeeji cuana huoojea caní quea huiso ojaya yajjijo quea pame a'yohua. Ojaya yajjijo ohuaya chaco meesahua caní ojjaña echaco. <sup>6</sup> Eyacuiñajji oe nei yani. Ohuaya Jesusaja epeeji cuana huoojea caní ojaya echacoji cuana a'yohua. Oe epeeji oe echacoji ameesahua caní, Eyacuiñajjiya. Pea epeeji pea echacoji ameesahua caní. <sup>7</sup> Edojjoshahua Pameya Jesusaja epeeji cuana quea pame ameesahua caní pea'ai. Jamajjeya ojjaña ba mee caje oya ese nijje nequi. E'e, ohuaya Jesusaja epeeji cuana quea ja'a ameesahua caní ojjaña Jesusa nijje ejjapeequi meesahuajji. <sup>8</sup> E'e, Edojjoshahua Pameya Jesusaja epeeji beca cuana quea jjashahuabaqui ja'a po mee caní Eyacuiñajjija ejjashahuabaquijji e'e jojo nei ehuhuijji. Pea epeejiya Eyacuiñajjija esohui jayojja jama onaya ba meesahua caní quea ja'a nee. <sup>9</sup> Pea epeeji cuana Jesusaja epeeji cuana quea ja'a, mete'ama pea'ai po mee caní. Beca epeeji cuana emanoojaa cuana huaquia meesahua caní Edojjoshahua Pameya. <sup>10</sup> Ohuaya pea epeeji cuana ma dejjaa ajjima acaní ameesahua caní. Pea epeeji Eyacuiñajjija esohui huohui meesahua caní quea ja'a nee, pea ba'e meeji. Beca cuana ba meesahua caní ache cuana e'e jojo nei ojaya, Edojjoshahua Pameja huoojea'yo poani ebajji. Ache dejja eshahua nijje quehuajje jjapeequiani

ba meesahua cani pea'ai. Edojjoshahua Pameya beca cuana Eyacuiñajjija emimi mimi meesahua cani. Pea cuana ma emimi huohui meesahua cani ojjaña cuanaja ebajji. <sup>11</sup> E'e, Edojjoshahua Pameya ojjaña Jesusaja epeeji jamaya ameesahua cani quea huiso. Ojaya ejjashahuabaquijji ojaya epeeji cuana huoojea cani, Edojjoshahua Pameya.

*Esejaya Emeshi Mese oe nei yani; ojaya epeeji cuana oja yami jayojja jama poani*

<sup>12</sup> Ecuea eyami oe nei yani. Yaa cuana yani, equise cuana pea'ai yani. Quea huiso pea aqui ana cuana yani ecue eyamijo. Jamatii ecuea eyami oe nei. Oya jayojjaya Jesusaja epeeji cuana poani, quea huiso ojee onijje jjapeequianijo. Jamatii ojjaña oe eyami jayojja jama poani; Jesosa Quitoja eyami jayojja jama eseya poani. <sup>13</sup> Jamaya poanaje ojjaña eseya ojaya epeeji cuana poanijo. E'e, Jodio cuana, Jodio pojjeama cuana ojaya epeeji poani. Sosema' chaco chacoani cuana, echaco mesema' pea'ai ojaya epeeji poani. Jamajjeya Edojjoshahua Pameya eseya Jesosa Quitoja eyami jayojja jama po mee canaje ojjaña, onijje jjapeequianijo. Edojjoshahua Pameya esejo nequiya Jesusaja epeeji quea ja'a po mee cani.

<sup>14</sup> E'e, esejaya eyami oe nei yani. Jamatii yaa yani, equise yani, ecojja yani, quea huiso pea aqui ana yani esejaya yamijo pea'ai. <sup>15</sup> Ejiojji eme' jayojja jama pojjeama. Jamatii ejiojji quea pame nee. A'a ejiojji jama poaje pojja'a ba'a: —Eya eme'

jayojja pojjeamajo eyamijo enequijji pojjeama — ¿a'a jamaya mimi majje enequijji pojjeama? Chojja, jamaya po majje oya jamatii eyamijo nequi, de.

<sup>16</sup> E'e, eshajja ecojja jayojja jama pojjeama. Jamatii eshajja pea'ai quea pame nee, esapajo nequi pea'ai. Eshajja jama mimijajime epojji pojjeama ba'a: —Eya ecojja jjemo eyamijo nequime — jamaya mimijaji ajja, jamatii jamaya po majje eyamijo nequime, de.

<sup>17</sup> E'e, ecuea eyami ecojja oopana pojjeama. Chojja. Eshajja yani pea'ai ejjashajja'ajjaquijji. Ecuea eyami eshajja oopana pojjeama. Yani ehui pea'ai ejjashiye'ajjaquijji. <sup>18</sup> E'e, Eyacuiñajjiya ecuea eyami pana ca poa. Ohuaya sa cani jayojja jama aca poa. Jamajjeya ecojja cuana, eshajja cuana, ehui cuana, quea huiso pea aquiana pea'ai pana ca poa, ohuaya. <sup>19</sup> Jamaya epana jojjemo eya ese ejja pojjeama pome. E'e, Eyacuiñajjiya ecuea eyami ecojja oopana ajjima poa. Eya ecojja oopana e'a jojjemo eya ese ejja jayojja jama pojjeama pome. Jamajjeya ohuaya ecue eyamijo quea huiso aquiana pana canaje, jjashajja'ajjaquijji po mee canaje, jjashiye'ajjaquijji po mee canaje pea'ai. <sup>20</sup> E'e jojo nei ecuea eyamijo yani quea huiso aquiana. Jamatii ecuea eyami oe nei jayojja jama poani. Oya jayojjaya Jesusaja epeeji quea huiso nee yani. Jamatii ojee onijje jjapeequianijo eseya oe jayojja jama poani, Jesusaja eyami jayojja jama poani.

<sup>21</sup> Ecuea ecojjaa eme' cajaa a'ajja poani. Esapaa ejiojji cajaa ajjima acani pea'ai. Chojja ojjaña ojee quea pame nee nee poani. <sup>22</sup> Eyami dojjojo ca'a'ama. Jamatii eyami dojjojo cuana chama'



jojemo eyami eshe pojjeama pome. <sup>23</sup> Beca eyami dojjojo e'e pojja'a hua'ama. Jamatii eseyaya eyami dojjojo ani nahue neineiaña. Pea aquiana eyamijo anijo eseyaya daqui huoshoaña bicho'ama epojji. <sup>24</sup> Jamatii pea eyamijo esapajo, emejo bicho'amajo daqui mi huoshoaña. Eyacuiñajji ca ca bicho'ama eseya eyamijo. Ojjaña aquiana eyamijo oja pana. Ojjaña eyami ojee nequia canaje oe eyamijo. Jiquio ecua eseyaya eseyaya eyami nahueaña ojjaña eyami, jamatii beca cuanajo se quea bicho poani jama jayojja ¡Jesosaja epeejiya pea epeeji jjapeequi meesahuacue onijje quea pame nee! <sup>25</sup> Ojjaña aquiana eyamijo ani oe eyami poani, ojee acani quea pame nee. Oe eyami pea eyamiya nahue cani. Jamajjeya eyami quea pame nee poani. ¡Ma jayojja jama eseyaya Jesosaja epeeji ojee ejjachacoqui onijje! <sup>26</sup> E'e, oe mijijje eyami quea nee poanijo, pea mijijje quea mano poaje pea'ai. Ojjaña mijijje eyami cuana quea aja poanijo, quea pame nee poaje ojjaña. Oya jayojjaya eseya Jesosaja epeeji oe eyami jayojjaya poani. Jamajjeya oe epeeji quea nee poanijo, ojjaña quea yeno poani ojo. Oe epeejiya quea pame nee nee acanijo, ojjaña onijje quea bihui nee poani.

<sup>27</sup> Jamajjeya ojaya ejjashahuabaquijji jama Eyacuiñajjiya eseyaya eyami cuana pana ca poa quea huiso peapea cuana eyami. Oya jayojjaya Jesosaja epeeji cuana ojaya eyami quea huiso cuana jayojja jama poani. <sup>28</sup> Jamajjeya Eyacuiñajjiya eseya Jesosaja epeeji cuana quea huiso peapea jjashahuabaqui'yome asahua cani ojaya epeeji cuana quea ja'a epojji. E'e, ohuaya beca epeeji

huohui canaje jama ba'a: —Miya ecuea ehoojea-coo Jesosa Quitojo huohuiya.

Ohuaya pea cuana huohui canaje jama ba'a: — ¡Ojjaña cuiñajji yasijje esohui quea pame nee Jesosa Quitojo huohuiquicue quea ja'a nee ojjañaja esha-jja'ajjajji!

Pea cuana huohui canaje jama ba'a: —¡Jesosa Quitoja epeeji cuana esohui huohuijji pocue!

Pea cuana ma dejjaa ajjima acani ameesahua canaje. Pea cuana emanojaa cuana huaquia meesahua canaje pea'ai. Pea epeeji cuana ona quea pame ba'e meesahuajji po mee canaje. Pea epeeji emeshi mese jayojja jama ojjaña jaahua-najji po mee cani. Pea cuana Eyacuiñajjiya pea emimi mimi meesahua cani. <sup>29</sup> ¿A'a ojjaña Jesosaja epeeji cuana Eyacuiñajjiya huoojea cani esohui quea pame Jesosajo huohui coohua? ¿A'a ojjaña epeeji cuaa Eyacuiñajjiya esohui quea huesha huohui cani? ¿A'a ojjaña ojaya epeeji cuana esohui huohuijji poani? ¿A'a ojjaña epeeji ma dejjaa ajjima acani ameesahua cani? Chojja. <sup>30</sup> ¿A'a ojjaña epeeji cuaa emanojaa cuana huaquia mee cani? Chojja. ¿A'a ojjaña ojaya epeeji cuana Eyacuiñajjiya emimi mimi meesahua cani? Chojja. ¿A'a ojjaña epeejiya ma emimi eseja esohuijo huohui cani ojjañaja ebajji? Chojja. <sup>31</sup> E'e, Edo-jjoshahua Pameya eseya, Jesosaja epeeji cuana Eyacuiñajjiyo chaco meesahua cani. ¡Miquianaaya Eyacuiñajjiyo quea pame nee chaco neinei sa añajo quea pame nee oe acue, pea epeeji cuana quea ja'a nee eba'e meesahuajji! Jamatii eyaya miya huohuije e'e jojo nei joya ojjaña quea jea nee nee

acani Eyacuiñajjiya ba cani quea pame nee nee.  
Jamajjeya ojjaña quea jea acue!

## 13

*Eyacuiñajjiya eseya ojjaña quea jea nee  
ameesahua cani*

<sup>1</sup> E'e, ojjaña e'e jojo nei quea jea acue jama ba'a: E'e pojja'a ojjaña dejjaja emimi, esohuido-jojjiya emimi quea pame nee pea'ai mimi majje jamatii pea epeeji ecuea quea jea nee pojjeama. Jamajjeya ecuea pea cuana Jesosa nijje ejjapeequi meesahuajji pojjeama. Eya mimiani emimijeajji, esho'iquiaa cuaqueyajea cani jama quea shaj-jaquijjo epojji. <sup>2</sup> Eyacuiñajjiya eya ojaya esohui quea huesha nee huohui meesahua cajje ojaya ej-jashahuabaquijji ba meesahua cajje pea'ai, ojjaña ojaya esohui etehue'yo ba meesahua cajje pea'ai, ma dejjaa ajjima acani ameesahua cajje pea'ai jamatii pea epeeji ecuea quea jea nee pojjeama. Jamajjeya eyaya pea cuana Jesosa nijje ejjapeequi meesahuajji pojjeama. Eyacuiñajjiya eya ba cani mimishi cuijea'yo jjima pea'ai. <sup>3</sup> Ojjaña ecuea aquiiana cuana aema' cuana huasijje quiaje'yo pojja'a; Jesosa nijje jjapee nishoquianijo, e'e pojja'a pea cuaa eya iña caje ejeanobiajeajji. Jamatii pea cuana quea jea nee a'ajjajo eyaya oya cuana eba'e meesahua'yojji pojjeama Jesosa nijje. Eyacuiñajjiya eya ba cani mimishi cuijea'yo jjima pea'ai.

<sup>4</sup> Pea cuana e'e jojo nei ecuea quea jea nee nee amajje oya cuana ecuea tecuea cuajijji pojjeama. Quea bei poaje. Pea cuanaja aquiiana quea jea

yajji pojjeama. Ecuea ehuohuijji pojjeama jama ba'a: —Eya ca iña quea pame nee nee poani.

Pea jayojja po sa po ajja nei nei pea'ai ca iña. <sup>5</sup> Pea cuana e'e jojo nei ecuea quea jea nee neejo ecuea eniñebajji pojjeama. Pea nijje emim-ijajijji pojjeama. Quea nahue pojjeama poani, equenequene cuajijji pojjeama pea'ai. Pea cuana e'e jojo nei ecuea quea jea neejo, eya onaa quea tai acajje, aquiana napa cajje pea'ai eya quea yeno po tiitii ajja: —Onaaya eya quea mimishi acajje eyaya oya quea mimishi a pea'aije'yo —jamaya a'a jjashahuabaquijji.

<sup>6</sup> Eyacuiñajji ecuea quea jea nee poanijo ecuea onajaya mimishi cuana boti'ama poaje. Ona quea pame nee poanijo ca ca eya quea bihui nee poaje pea'ai. <sup>7</sup> Pea cuana e'e jojo nei ecuea quea jea nee poanijo e napajji cuana nijje quea quene po ajja. Oe epeejji pea epeejjijo siajje poanijo, ecuea eshaja'ajjajji pojjeama. Jesosa nijje jjapee tiitiiquije'yo jamatii quea camaja poanijo. Jjashahuaba tiitiiquije'yo jama ba'a: —E'e jojo nei Jesusaja epeejji poanijo, ohuaya eya ba'e tiitii mee caje'yo onijje eyajo.

<sup>8</sup> Eyaya pea cuana quea jea nee atiitiije'yo. Jamaya sa poani Eyacuiñajji. Jjeya ca ca Eyacuiñajjiya ojaya epeejji cuana esohui quea pame huohui meesahua cani. Jamatii eyajo huohui pajeaje'yo. Jjeya beca cuana Eyacuiñajjiya emimi mimi cani. Jamatii eyajo ma emimi mimi pajea caje'yo. Jjeya Eyacuiñajjiya ejjashahuabaquijji ba meesahua cani oe pojji. Quijje eyajo ojaña ba mee caje'yo quea huiso. <sup>9</sup> Jjeya eseya Eyacuiñajjiya ejjashahuabaquijji oe pojji nei ba

mee cani. Jjeya Edojjoshahua Pameya eseya Eyacuiñajjija ejjashahuabaquijji oe pojji nei huohui meesahua cani. <sup>10</sup> Jesosa Quito poe o'oyajo ca ca eseya ojjaña Eyacuiñajjija ejjashahuabaquijji cuana quea pame nee nee ba mee caje'yo.

<sup>11</sup> Jama poaje ba'a: Eya esho'yahuaajo oe pojji jjashahuabaquinaje quea pame pishana. Ecuea esohui cuana quea pame pishana poanaje pea'ai. Tii majje ca ca etii jama jjashahuabaquime poanaje, quea ja'a nee. Quea ja'a nee huohuinaje pea'ai. <sup>12</sup> Oya jayojjaya jjeya eseyaya Quito ba jjima aña ecojjaa. Jamajjeya ojjaña ojaya ejjashahuabaquijji ba mee jjima acani. Quijje poe o'oya majje ese cojja neijo nequi oya mimije'yo. Jjeya ohuaya ojjaña esejaya ejjashahuabaquijji ba neinei cani. O poe o'oyajo eseyaya ojaya ejjashahuabaquijji ba neineiye'yo pea'ai quea ja'a nee. Oya eseyaya ba neineiye'yo pea'ai.

<sup>13</sup> E'e, Jesosa Quito poe o'oyajo, eseya onijje jjapee tiitiquije'yo. Ojaya epoe'yojjijo eseya jja'ishoa'ajjaquiani. Jjeya esejaya ojaya epeejji cuana quea jea nee poani. E'e, Jesosa Quitoja epoe'yojjijo jja'ishoa'ajjaquiani, onijje jjapeequiani pea'ai. Ojaya epeejji cuana quea jea nee atiitiaña pea'ai. Jamaya Eyacuiñajji sa poani.

## 14

*Edojjoshahua Pameya eseya chaco meesahua cani Jesosa nijje*

<sup>1</sup> Jamajjeya ijashahuaba tiitiquicue pea cuana quea jea nee e'ajji! Jamaya mimicue ba'a: — Eyacuiñajji, ¡Edojjoshahua Pame huoojeacue e que

mi jayojja ameesahuaa, Jesusaja epeeji cuana quea ja'a nee onijje ejjapeequi meesahuajji! E'e, imiquea ejjashahuabaquijji huohui meesahuacue ojjaña meshi yasijje!

<sup>2</sup> Ojjaña joya Eyacuiñajjija emimijo mimiani onajaya ba jjima esohuijo Eyacuiñajji nijje mimiani, pea cuana nijje pojjeama. Edojjoshahua Pameya maya mimi meesahua cani. Jamatii pea cuanaja maya emimi quea quehua. Eyacuiñajjiya ohuaye nei shajja'ajja cani. <sup>3</sup> Eyacuiñajjija esohui cuana quea ja'a nee huohui canijo ca ca Jesusaja epeeji cuaa quea ja'a shajja'ajja cani. Onijje jjapee neineiqui meesahua cani. Quea bihui nee po meesahua cani pea'ai. <sup>4</sup> Ojjaña joya Eyacuiñajjija emimijo mimiani onijje nei mimiani. Oya oe nei quea bihui nee poaje. Joya Eyacuiñajjija esohui quea ja'a nee huohuijji poaniya ca ca quea huiso Jesusaja epeeji cuana quea bihui nee po mee caje.

<sup>5</sup> Eya miquianajo jjashahuabaquiani jama ba'a: Ojjaña miquianaya Eyacuiñajjija emimijo mimianijo jamaya quea pame pishana poaje. Eya quea bihui pishana poaje. Miquianaaya Eyacuiñajjija esohui joya ojjañaja eba esohuijo huohuiañajo ca ca jamaya quea pame nee nee, eya quea bihui nee nee poaje. E'e, Eyacuiñajjija esohui quea ja'a nee huohui majje pea cuana Jesusa nijje ejjapeequi meesahuaña. Eyacuiñajjija pea emimijo mimi majje aje oe pea cuana Jesusa nijje ejjapeequi meesahuajji pojjeama. Pea epeejiya Eyacuiñajjija pea emimi, ma ojjañaja quea quehua shajja'ajja majje cahuhui cahua esejaya esohuijo. Jamaya ohuaya huohui majje ojjaña Jesusaja epeeji cuana

quea pame nee jjapeequi meesahua caje Jesosa nijje.

<sup>6</sup>Jamajjeya epeeji cuana, eya miquiana que poe majje mimi ajja pea emimijo joya miquianajaya bajjima esohuijo. Chojja, maya emimi shajja'ajja majje miquianaya Jesosa nijje ejjapeequijji pojjeama. Quea ja'a nee ca ca eyaya Eyacuiñajjija ejjashahuabaquijji miquianaya ba meesahuaje. Ojaya esohui eyacua Jesusaja ba meesahuaje pea'ai.

<sup>7</sup>¡Jiquio esohuijo jjashahuabaquicue pea'ai! Dejja cuanaja ba jjima pishanajo dehue quea ja'a nee miamia ajja. E'ñaqueyaji bajjea jjimajo quea ja'a ñaqueyaqueya ajja pea'ai. Jamatii quea shajjaquijjo poaje, quea quehua. Jamajjeya ojjañaja eshajja'ajjaji pojjeama. <sup>8</sup>Echacomeejjiya eshe'ana mia jjimajo, echacoji cuana poqui ajja chachahua. <sup>9</sup>Oya jayojjaya miquianaya pea emimijo joya onajaya quea quehuajo mimianijo, miquea esohui onajaya eshajja'ajjaji pojjeama. Jamajjeya jesohui joya onaja quea ja'a neejo huohuicue ojjañaja ebajji! <sup>10</sup>E'e, dejja cuana quea huiso meshi cuanajo ba'yani. Quea huiso emimijo mimiani pea'ai. Jamatii ojjaña emimi ojjaña meshijo quea ja'a nee poani, ma meshijo ba'eja quea ja'a. Jamajjeya ojjañaja emimi onijje ba'e cuanaja quea ja'a nee. <sup>11</sup>Jamatii oe dejja pea emimijo joya ecuea quea quehuajo mimianijo oya pea dejja, eya ojaya pea poani pea'ai. <sup>12</sup>Jamajjeya miquianaya Edojjoshahua Pame nijje quea pame nee a sa poanijo Edojjoshahua Pame nijje mimicue jama ba'a: — ¡Eya ameesahuacue quea pame nee, quea ja'a nee! Jamajjeya eya quea huiso Jesusaja epeeji cuana

onijje jjapeequi meesahuaje. E'e, ¡quea ja'a nee nee Eyacuiñajjija esohui huohui meesahuacue mo!

<sup>13</sup> Jamajoya Jesusaja epeeji Eyacuiñajjija emimijo joya pea cuanaja quea quehuajo mimi majje oya Eyacuiñajji nijje camimiahua jama ba'a: —Ecue Chii, ¡joya o miminaje mo huohui meesahua'yocue pea epeeji cuanaja quea ja'a nee epojji! ¡Maya esohui mo huohui meesahuacue quea ja'a nee onajaya ebajji! —jamaya mimicue Eyacuiñajji nijje.

<sup>14</sup> E'e, Eyacuiñajjija pea emimijo ma ecuea ba jjimajo onijje mimi mee cajje jamatii ma e miminaje ecuea quea quehua poani pea'ai. Edojjoshahua Pameya eya mimi meesahua cani ecuea ejjashahuabaquijji pojjeama. <sup>15</sup> Jamajjeya eya jama poaje ba'a: Ecuea ejjashahuabaquijji quea ja'a nee jayojja eya mimije Eyacuiñajji nijje ecuea esohuijo; pea emimijo joya ecuea ba jjima esohuijo pea'ai eya onijje mimije pea'ai. Edojjoshahua Pameya eya sohuicuaya meesahua cani pea emimijo joya ecuea ba jjima esohuijo, ecuea edojjoshahua Jesusajo sohuicuayani; ecuea ejjashahuabaquijji quea ja'a nee jayojja jama eya sohuicuayani ecuea esohuijo pea'ai. <sup>16</sup> Miquiaaya pea emimijo Eyacuiñajji bihuiañajo, pea epeejjija minijje Eyacuiñajji ebihuiajji pojjeama. Ojaya ba jjima miquea esohui. <sup>17</sup> E'e, miyaya Eyacuiñajji bihuiaña quea pame nee. Jamatii miquea emimi onajaya quea quehua. Jamajjeya miyaya Jesusaja epeeji cuana onijje jjapeequi sahua jjima aje.

<sup>18</sup> Miquianaya oe pojji mimiani Eyacuiñajjija pea emimijo. Eyacuiñajjiya eya ojaya pea emimijo mimi meesahua canaje quea huiso. Jamajjeya eya



onijje mimiani jama ba'a: —Jamaya Eyacuiñajji, miyaya eya quea pame nee anaje.

<sup>19</sup> Jamatii Jesusaja epeeji cuana ojee nequiani Eyacuiñajjija esohui shajja'ajjajji, eyaya quea ja'a nee huohui sa aña joya onaja ojjañaja eba esohuijo. Esohui quea ja'a nee, quehua'ama mimianijo, ojjaña shajja'ajja caje quea ja'a nee. Jamaya quea pame nee nee. Huohui sa po ajja quea huiso esohui pea emimijo, joya onajaya ba jjima esohuijo. Jamaya quea pame pishana.

<sup>20</sup> Ecuea epeeji cuana, ¡quea sho'i tai jayojja jama a'a jjashahuabaquijji! ¡Quea ja'a nee jjashahuabaquicue! ¡Jesusa Quitoja esohui ba neineicue! ¡A'a quea mimishi ba'eji pea'ai!

<sup>21</sup> Eyacuiñajjiya esohui yahuajo nei tehue mee ca poa jama ba'a:

“Pea cuana pea meshijo ba'e, ma pea esohuijo mimiani pea'ai eyaya huoojeaje Jodio cuana jjabahuejjaqui meeya. Jamatii oya cuana aje oe o shajja'ajja sa po ajja poaje”.

Jamaya Eyacuiñajjija esohui poa.

<sup>22</sup> Jamajjeya Jesusa Quitoja epeeji etiiya Eyacuiñajjija pea emimi shajja'ajja majje ba caje Eyacuiñajji e'e jojo nei ona nijje nequi. ¡Jesusaja epeeji pojjeama cuana ca oe Eyacuiñajjija esohui huohuicue; joya o mimiani esohuijoya oe huohuicue! Esohui shajja'ajja majje oya cuana jjapeequije'yo Jesusa nijje. <sup>23</sup> Jamajjeya Jesusaja epeeji cuana ojee nequianijo, e'e pojja'a ojjaña miquianaya Eyacuiñajjija pea emimijo mimije. Jesusaja epeeji pojjeama cuaa, ojaya epeeji eyacua pea'aiya ma emimi shajja'ajja majje ¿ae shai oya cuana jjashahuabaquije? Miquianaya onajaya

ba jjima esohuijo mimiani shajja'ajja majje jama acaje ba'a: —¡Dee! Jesusaja epeeji cuana niñe poqui'yonaje. Jamajjeya quea quehua mimiani —acaje.

<sup>24</sup> Jesusaja epeeji cuaa ojee nequi majje Eyacuiñajjija esohui quea ja'a nee huohui canijo ca ca, pea cuana shajja'ajja majje ojaya mimishi cuanajo quea yeno poaje. E'e, Jesusaja epeeji pojjeama cuana, ojaya epeeji eyacua cuana pojja'a Eyacuiñajjija esohui shajja'ajja majje quea mete poaje jama ba'a: —Eyacuiñajjiya eya quea nee nee po mee caje'yo, de, ecuea mimishijo.

<sup>25</sup> Eyacuiñajjija esohui huohuijjiya ma dejja cuanaja ejjashahuabaquiji tai huohui cajo, shajja'ajja majje oya cuaa Eyacuiñajji bihuia caje ecui'oshajjajo nequiya. Jama poaje ba'a: —E'e jojo nei Eyacuiñajji miqiana nijje nequi —acaje cuaa. Jesosa nijje jjapeequije'yo pea'ai.

*¡Jesusaja epeeji ojee nequianijo Eyacuiñajjija esohui huohucue quea ja'a nee!*

<sup>26</sup> Jamajjeya ecuea epeeji cuana, ¡bacue jiquio esohui! Miqianaya ojee nequi majje Eyacuiñajjija esohui huohuiya, jama acue ba'a: Oe epeejiya Jesosa cabihuia cahua esohuicuayajjijo. Pea epeejiya Eyacuiñajjija esohui cahuohui cahua. Peaa Eyacuiñajjija ejjashahuabaquiji pea cuana que cahuohui cahua. Majoya pea epeeji Eyacuiñajjija pea emimijo mimi sa poanijo, peaa cahuohui cahua esejaya esohuijo. Jamajjeya ¡Jesusaja epeeji ojee nequianijo quea ja'a nee acue! ¡Ojjaña Eyacuiñajji nijje jjapeequi meesahuacue! <sup>27</sup> E'e pojja'a beca cuana Eyacuiñajjija pea emimijo mimi

sa poani. ¡Beca cuana, pea beca peejjima pojja'a mimi meecue, quea huiso pojjeama! Ma pea emimi mimianijo, ¡a'a ojee mimi meeji! ¡Oe epeeji mimi pajea'yajo, pea mimi meecue! ¡Oya mimi pajea'yajo, pea mimi meecue! Ma epeeji cuana Eyacuiñajjija pea emimijo mimi majje, peaa cahuohui cahua esejaya esohuijo ojjañaja ebajji. <sup>28</sup> Pea epeejjija ma emimi ba jjimajo, ¡a'a mimi meeji Jesusaja epeeji cuana ojee nequi yasiije! Oya oe nei nequi majje Eyacuiñajjija emimijo camimiahua Eyacuiñajji nijje.

<sup>29</sup> Miquiana ojee nequijo beca esohui huohuijjiya, pea beca peejjima pojja'aa Eyacuiñajjija esohui quea ja'a nee cahuohui cahua, quea huiso pojjeama. Pea cuaa cashajja'ajja cahua. Shajja'ajja majje cajjashahuabaquiahua jama ba'a: —¿A'a e'e jojo nei Eyacuiñajjija esohui huohui canaje? — cajjashahuabaquiahua.

<sup>30</sup> Jamatii Edojjoshahua Pameya pea epeeji jjashahuabaqui meesahua caje, oya pea'ai camimiahua ojjañaja eshajja'ajjajji. E'e, esohui huohuijjiya huohui pajea cajo, ma epeejiya Eyacuiñajjija ejjashahuabaquiiji cahuohui cahua. <sup>31</sup> Jamaya miquianaaya Eyacuiñajjija ejjashahuabaquiiji ba majje huohuije ojjañaa. ¡Pea acaje jja a'a huohuiji! ¡Oe epeejiya huohui pajea cajo, pea epeejiya cahuohui cahua! Jamajjeya Jesusaja epeeji cuana ba mee caje quea huiso Eyacuiñajjija esohui. Quea bihui nee poaje pea'ai. <sup>32</sup> Jesusaja esohui huohui sa poanijo ¡ca'ishoa cahua! ¡Pea mimi pajea'yajo cahuohui cahua! <sup>33</sup> E'e, Eyacuiñajjija equijo ojaya epeeji cuaa ¡a'a becajje huohuiji! Quea shajjaquijjo

poaje. Eyacuiñajjiya ojaya epeeji cuana ojee shajja'ajja mee cani quea bei. ¡Bacue! Ojjaña Eyacuiñajjiya equi cuanajo Jesosaja epeeji ojee nequi majje quea ja'a nee esohui huohui cani; becajje pojjeama huohui cani.

<sup>34</sup> Epona cuana, ojjaña Eyacuiñajjiya equijo ojee nequianijo, ja'a mimijji Eyacuiñajjiya esohui huohuijji mimianijo! ¡Jashajja'ajjaquicue oe! Jodio cuanaja esohui etehue'yo yahuajo jama poa pea'ai ba'a:

“¡Eyacuiñajjiya equijo epona cuana cajjashajja'ajjaquiahua! Eyacuiñajjiya epeeji cuana hoojeajji pojjeama oya cuana”.

Jamaya poa yahuajo. <sup>35</sup> Esohui shajja'ajja majje e'e pojja'a epona cuana huohui'ajja sa poani ma esohuijo. Jamatii ¡Eyacuiñajjiya equijo a'a huohui'ajjajji! Jamaya quea pame pojjeama. Ojaya equi yasijje poqui majje ojaya yahue cahuhui'ajja cahua, eponaa.

<sup>36</sup> Ecuea epeeji cuana Conitojo ba'e, miquianajaya eba Eyacuiñajjiya esohui miquiana que poe coo jjima. Chojja. Pea cuaa ojaya esohui shajja'ajja canaje miquianaja shajja'ajja jjimahuajo. Jamajjeya ¡shajja'ajjacue mo!

<sup>37</sup> Miquianaya beca cuana jama poani ba'a: — Eya Eyacuiñajjiya esohui huohuijji e'e jojo nei poani. Eya Edojjoshahua Pameya quea pame nee ameesahua caje'yo Eyacuiñajjiyo. Jamajjeya ¡miquianaya jjabahuejjaquicue ecuea esohui Eyacuiñajjiya esohui e'e nei poani! <sup>38</sup> Ojjaña joya miquiana nijje nequi ecuea esohui shajja'ajja sa po ajja, ja'a oya cuana shajja'ajjajji!

<sup>39</sup> Ecuea epeejji cuana, jamajjeya ¡Eyacuiñajjija esohui huohui neineicue! Pea epeejji Eyacuiñajjija pea emimijo mimi sa poanijo ¡oya camimiahua!  
<sup>40</sup> Jamajjeya ¡Eyacuiñajjija equijo ojee nequi majje ojjaña quea ja'a nee acue! ¡Ojjaña Jesosaja epeejji cuana shajja'ajjacue quea ja'a nee pea'ai!

## 15

### *Jesosa Quito mano'yo majje shequi o'oyanaje*

<sup>1</sup> Jjeyahua nei eya miquiana huasijje huohui sa o'oya poani esohui quea pame nee Jesosa Quitojo. Yahuaajo pishana ma esohui shajja'ajja majje miquianaya onijje jjapeequi'yonaje quea ja'a nee. <sup>2</sup> Ma esohui Jesosa Quitoja eyaya huohuinaje. Shajja'ajja majje miquianaya onijje jjapeequi'yonaje quea ja'a nee, cuaqui yasijje epoqui'yojji pojjeama. Jamatii Jesosa Quito nijje e'e jojo nei jjapeequi jjima ca mi ca oe cuaqui yasijje poquije'yo.

<sup>3</sup> E'e, ma esohui quea pame nee Jesosa Quitojo shajja'ajja majje eyaya huohuinaje miquianajaya eshajja'ajjajji jama ba'a: Eyacuiñajjija esohui yahuaajo etehue'yo jayojja jama e'e jojo nei Jesosa Quito eseja mimishi cuanajo mano'yonaje.

<sup>4</sup> Jesosa Quito mano'yajo, ojaya epeejji cuaa oya jjani ai yasijje huananobia ca'ya poa. Pea beca peejjima cahui po majje, Eyacuiñajjiya oya, Jesosa Quito shequi mee ca o'oya poa. E'e, Eyacuiñajjija esohui yahuaajo nei etehue'yo jayojja jama aca poa Jesosaa. <sup>5</sup> Eshe o'oya poajo, Penohua oya ba canaje. Majoya ome miji pea'ai pea becaa, 12 huisomeya ojaya pea epeejji cuaa Jesosa Quito

ba ca'yonaje, oja huoojea'yo cuaa. <sup>6</sup> Majoya qui-  
 jje pishana quea huiso ojaya epeeji cuaa, 500  
 huisomeya ojee jjachichaqui majje Jesosa Quito  
 ba canaje eshe o'oya. Quea huiso ma epeeji  
 jjeya eshe enequi'yo. Beca cuana mano'yonaje.  
<sup>7</sup> Majoya pea pojjaajo Satiacohua Jesosa Quito ba  
 canaje eshe o'oya. Majoya ojjaña oja huoojea'yo  
 cuaa oya ba canaje eshe o'oya. <sup>8</sup> Majoya eyaya  
 quijjeyejje neiya Jesosa Quito banaje pea'ai. E'e,  
 yahuajo eya ojaya epeeji pojjeama poa. Jjeya  
 ca ca eya ojaya epeeji po mee ca'yonaje pea'ai.  
<sup>9</sup> Jamajjeya eya quea pame pishana. Pea oja  
 huoojea'yo cuana quea pame nee poani. E'e, o ba  
 jjimahuajo eyaya ojaya epeeji cuana janobajjima  
 nei napanaje. Jamatii Eyacuiñajjiya eya babaca  
 canaje Jesusaja huoojea'yo epojji pea'ai. <sup>10</sup> Eya  
 Eyacuiñajjiya quea jea nee nee poani. Jamajjeya  
 ojaya esohui huohuiji po mee canaje, Jesusaja  
 huoojea'yo po mee canaje pea'ai. Ohua huoojea  
 cajje eyaya ojaya esohui huohui neinei'yonaje.  
 Jesusaja pea ehoojea'yo cuaa quea huiso pishana  
 chaco canaje ojo. Eyaya ca ca ojo janobajjima  
 nei chaco tiitiaña ohuaya eya chaco meesahua  
 canajejo. E'e, ohuaya eya chaco meesahua ajja jo-  
 jjemo eyaya ojo chaco jjima ame. <sup>11</sup> E'e pojja'a pea  
 ehoojea'yoja esohui Jesosa Quitojo miqianaaya  
 shajja'ajjanaje. E'e pojja'a ecuea esohui ojo sha-  
 jja'ajjanaje. Jamatii, ojjaña ecuaaya ma esohui  
 quea pame Jesosa Quitojo huohuiaña. ¡Shajja'ajja  
 majje miqianaaya ojaya esohui jayojja jama e'e  
 jojo nei ba'ecue!

*Jesosa Quitoja epeeji cuana quijje eshe o'oya*

*poaje*

<sup>12</sup> E'e, miqiana huasijje ecuaaya huohuinaje jama ba'a: —Jesosa Quito mano'yajo, Eyacuiñajjiya oya shequi mee ca o'oyanaje.

Jamajjeya ¿apiojji acuae jja oe miqianaya beca cuana jjeya siajje poani? Jama ba'a: —Eseya mano'yajo quijje eshequi mee'yojji pojjeama — ¿apiojji jamaya siajje poani?

Chojja. Shequi mee caje o'oya eseya. <sup>13</sup> ¡Bacue, oe! Mano'yo majje eshe o'oya po meemee ajja jojjemo Jesosa Quito mano'yo majje shequi mee o'oya jjima acaquiaye pea'ai. Chojja. Oya shequi mee ca'ya poa, Eyacuiñajjiya. <sup>14</sup> Oya eshe o'oya pojjeama poa jojjemo ecuanaja esohui quea pame nee ojo e'e nei pojjeama pome. Oya mi shequi o'oya poa jojjemo miqianaya onijje jjapeequi jjima pome pea'ai. <sup>15</sup> Ecuaaya huohuiaña jama ba'a: —Eyacuiñajjiya Jesosa Quito shequi mee ca'yonaje —jamaya e'e nei pojjeama jojjemo ecuaña siajje ponequime. Chojja, de. ¡Shajja'ajjacue mo! Ma siajjepojji cuanaja esohui e'e nei poani jojjemo ca emano'yo cuana shequi'yo jjima pome, Jesosa Quito shequi'yo jjima poquiaye pea'ai. Chojja, ecuea eba oya shequi'yonaje. <sup>16</sup> E'e, emano'yo cuana shequi'yo ajja jojjemo Jesosa Quito pea'ai shequi'yo jjima poquiaye. <sup>17</sup> Oya shequi o'oya jjima jojjemo miqianaaya siajjepojji esohui shajja'ajja'yome, Jesosa nijje jjapeequi jjima pome. E'e, Jesosa Quito shequi o'oya jjima poa jojjemo Eyacuiñajji quea quene nee tii pome, miqianajaya mimishi cuijea'yo jjima pea'ai pome. Chojja, ecuea eba Jesosa Quito shequi o'oyanaje. <sup>18</sup> Oya shequi o'oya jjima jojjemo

ojaya epeeji yahuaajo mano'yo cuana cuaqui yasi-  
jje poqui'yoquiaye. Chojja, ecuea eba Jesosa Quito  
shequi o'oya poa. <sup>19</sup> E'e, eseya quea bihui nee oni-  
jje jjapeequi mee canaje jiquio meshijo ba'yanijo.  
Jamatii eseya eshe o'oya po mee ajja jojjemo eyajo  
onijje ba'e tiitii mee'yo jjima acame. Jamaya  
poani jojjemo ojjaña cuana esejo mimi'yome jama  
ba'a: —Pabohua ecuana siajje acanaje, de. “Jes-  
osa Quito nijje jjapeequi'yocue!” siajje a'yome  
acanaje.

Chojja, ecuea eba eseya eshe o'oya po mee  
caje'yo. <sup>20</sup> E'e jojo nei jamaya poanaje ba'a: Ey-  
acuiñajjiya Jesosa Quito shequi mee ca o'oyanaje,  
eyami eyacua acoo ca'yonaje emano o'oyajji poj-  
jeama. Jamajjeya esejaya eba ohuaya e'e jojo nei  
Jesosaja epeeji cuana ojjaña tii shequi mee caje  
o'oya emano o'oyajji pojjeama. <sup>21</sup> E'e, Adana quea  
mimishi poa sosejje mano mee ca'ya poa. Jama-  
jjeya ojjaña manaje'yo, ba'e tiitii ajja meshi cua-  
najo ba'eca. Jesosa Quitohua ca ca quea pame nee  
nee acanajejo, ojjaña eshe o'oya po mee caje'yo.  
<sup>22</sup> Ojjaña cuana Adanaja osecua cuana poanijo o  
jayojja quea mimishi poani. Jamajjeya Eyacuiñajji  
nijje ba'e meemee ajja eyajo. Jesosa Quito ni-  
jje jjapeequi majje ca ca ohuaya eseya ba'e tiitii  
mee caje'yo onijje eyajo eshe o'oya po mee'yo  
majje. <sup>23</sup> ¿Ache ebionei shequi mee ca o'oyanaje?  
Eyacuiñajjiya Jesosa Quito ebionei shequi mee ca  
o'oyanaje. Quijje poe o'oya majje ohuaya ojaya  
epeeji cuana shequi mee caje o'oya.

<sup>24</sup> E'e, quijje poe o'oya majje Jesosa Quito oj-  
jañaja Emeshi Mese nei poaje'yo, ojjaña huoo-  
jea'yojji. Jamajjeya ohuaya ojjaña quea mimishi



poani jeabichajea'yo majje iña caje'yo. Iña majje shajja'ajja mee caje'yo. E'e, ohuaya Edosiquiana nei shajja'ajja mee caje'yo pea'ai. Ojjaña eshahua cuana pea'ai, ojjaña emeshi mese quea tai cuana pea'ai shajja'ajja mee caje'yo, Jesosa Quitohua. Jamaya amajje ohuaya ojjaña cuana ojjaña meshi cuanajo ba'e oja Chii bihuia mee caje'yo jama ba'a: —Eyacuiñajji, miya quea ca'a nee nee ojjaña huoojea'yojji. ¡Ojjaña miya cashajja'ajja cahua! —jamaya ojjaña amee caje Jesosaa.

<sup>25</sup> E'e, Eyacuiñajjiya Jesosa Quito ojjaña mimishi cuana, eshahua cuana pea'ai jeabichajea meesahua cani. Jeabichajea jeyojeyo majje oya, Quito Emeshi Mese oe nei nei poaje'yo; ojjaña huoojea'yojji nei poaje'yo. <sup>26</sup> Yahuaje mimishi aca poa sosejje mano poquipoqui'yani. Quijyeyejje nei ese mano mee'yojji chama'yo tii a'yo majje ojjaña cuana eshe o'oya po mee caje'yo, Jesosa Quitohua. Mano'yo ajja tii tii po mee caje'yo. <sup>27</sup> Yahuaje nei Eyacuiñajjiya esohui etehue'yojo jama poa ba'a: “Eyacuiñajjiya ojjaña jeabichajea'yo majje ojjaña huoojea'yojji po mee caje'yo oya”. Jamaya yahuaje Eyacuiñajjiya Jesosa Quitojo aca poa.

Jamatii Jesosa Quito Eyacuiñajji huoojea'yojji pojjeama. Ojjaña pea cuana huoojea'yojji ca ca Quito po mee caje'yo, Eyacuiñajjiya. <sup>28</sup> E'e, Jesosa Quito ojjaña quea mimishi cuana jeabichajea sahuamee caje Eyacuiñajjiya, oya ojjaña huoojea'yojji po mee caje'yo. Majoya oja Chii nijje Jesosa Quito mimije jama ba'a: —Ecue Chii, miya e huoojea'yojji poani tii tii —jamaya poaje oja Bacua Ejja Jesosa Quito.

E'e, Eyacuiñajji e'e nei ojjaña huoojea'yojji poaje'yo tii tii; eyajo nequi cuana, meshijo ani cuana pea'ai huoojea'yojji poaje'yo tii tii.

<sup>29</sup> E'e jojo nei Eyacuiñajjiya eseya shequi mee caje o'oya. Jamatii beca cuana jama poani ba'a: —Emano'yo cuana eshequi mee o'oyajji pojjeama.

Beca epeeji cuana quea quehua jjashahuabaquiani jama ba'a: —Yahuajo Jesusaja epeeji mano'ya poa Eyacuiñajji besa mee jjima. Jamajjeya emano'yoja yajji ojava epeeji eshe nequi Eyacuiñajji besa mee cani cuaa emano'yoja bajjanijo, emano'yo cuana cuaquijo equiyo'yojji pojjeamajo —jamaya beca cuaa acani. Oya cuana jjashahuabaquiani ojjaña cuana shequi mee caje o'oya. Jamajjeya jamaya acani.

<sup>30</sup> Eyacuiñajjiya eseya eshe o'oya epo mee'yojji pojjeama jojjemo ¿ajeo acuae ecuaaya ojjaña pojja Jesosa Quitoja sohui huohuime? Ojava esohui huohuiañajo pea cuaa ecuana quecua nei nei sa acani. <sup>31</sup> Epeeji cuana, e'e jojo nei Eyacuiñajjiya eseya shequi mee caje o'oya. Miquiana esejaya Emeshi Mese nei Jesosa Quitoja esohui shajja'ajjanajejo, eya quea bihui nee. Jamatii pea cuaa quecuapana caniya tii eya Jesosa Quitojo chacochoani quea bihui nee. <sup>32</sup> E'e, eshahujaja epeeji cuaa ibia jama quea mase neeya Epesojo ba'eya eya beshahua nei mano mee ca'yonaje eya esohui ehuhui poajeje. Jesosa Quito eshe o'oya po ajja poa jojjemo ¿apiojji shai eyaya esohui huohui tiitiime so'o? Quea camaja nee poanaje. Dejja mimishi cuaa huohui cani jama ba'a: —Mecahuajje ecuana manoj'e'yo

eshequi'yojji pojjeama. ¡Jamajjeya jjeyahua nei e'ijjia'ijjia, e'ishi'ishi pea'ai! —poani.

Jamatii eshe epo o'oyajji pojjeama joggemo eseya jamaya po pea'aime. <sup>33</sup> ¡A'a quea quehua jjashahuabaquijji! ¡A'a onaaya miya jjadasia meequijji! Pea cuana siajje poani jama ba'a: —Ecuana eshequi mee o'oyajji pojjeama.

¡Onijje a'a jjapeequijji! O jayojjaya mi po chana', quea mimishi. <sup>34</sup> Jamajjeya ¡pajea'yocue ejjashahuabaquijji quea quehua! ¡Jesusaja esohui jayojja jama po o'oyacue! ¡Esohui quea quehuajo a'a jjashajja'ajjaquijji! Beca cuanaja Eyacuiñajjija esohui e'e nei ba jjima. Eyaya miquianaya huohuiaña quea bicho epojji.

*¿Achajja shequi o'oyame acuae se poaje?*

<sup>35</sup> E'e pojja'a miquianaaya eya huohui'ajjanaje jama ba'a: —¿Achajja shai Eyacuiñajjiya emano'yo cuana shequi mee caje o'oya? ¿Ache eyami shai esejaya poaje'yo? ¿A'a eyami eyacua?

<sup>36</sup> Miquianaya quea quehua jjashahuabaquian-ijo ¡bacue! Anoso quecua jjima tii ajja. Quejo quecua cajje meshijo pohua'yani. Siobijje pohua majje ejjii chama'yo poani, meshi pojji po'yani.

<sup>37</sup> Quejo quecua cani cuaa anoso, pea eso' pojja'a. Anoso sa' bana ca ajja. Chojja, eso' pohua majje esa' tiije'yo. <sup>38</sup> Eyacuiñajjiya eso' pohua mee'yo majje esa' tii mee cani. Jamajjeya anoso pohua majje anoso sa' tiiani. Pea same anoso, huenehuene sa' jayojja pojjeama. Jamaya Eyacuiñajjiya pana ca'ya poa.

<sup>39</sup> Oya jayojja eyami cuana: Oe eyami pea eyami jayojja pojjeama. Quea huiso peapea yamime

yani. Ijjiacajji pea yamime, dejja jayojja jama pojjeama. Cuichojjija eyami pea. Jai cuana pea yamime, cuichojjija jama pojjeama. <sup>40</sup> Oya jayojjaya eyajo Eyacuiñajjija esohuidojojji cuana yani quea huiso nee. Oya cuana yamima', dejja cuana jama pojjeama. Esohuidojojji cuaa quea pame acani Eyacuiñajjija yajjijo. Jamatii dejjaa acani jayojja jama pojjeama acani. Dejja cuanaja eyami quea bame pea'ai. Eseyaya quea pame aña Eyacuiñajjija yajjijo pea'ai. <sup>41</sup> Oya jayojjaya eshequi epojjajo quea pame nee. Ba'i eshequi jayojja jama pojjeama. Jamatii ba'i quea pame nee pea'ai. Majameta ba'i jayojja jama pojjeama. Jamatii majameta quea pame nee pea'ai. Oe majameta pea majameta jayojja jama pojjeama. Oe quea jiji nee, pea quea jiji pishana. Jamatii ojjaña quea pame nee.

<sup>42</sup> Jiquio ecua anoso quecua cajje Eyacuiñajjiya esa' pohua mee cani jayojja jama eseya mano'yajo, Eyacuiñajjiya eshe o'oya po mee caje'yo. E'e, mojea ca'yajje esejaya eyami ihuije'yo. Chama'yo tii poaje'yo. Eshe o'oya po mee ca'yajje ca ca emano'yojji pojjeama. Eyami eyacua poaje'yo, quea pame nee nee esejaya. <sup>43</sup> E'e, esejaya eyami mojea ca'yajje ihuije'yo. Ca'a'ama. Eshe o'oya po mee majje ca ca quea pame nee po mee caje'yo, Eyacuiñajjiya. Pea eyami eyacua quea ca'a nee poaje'yo emano beca'yojji pojjeama tii. <sup>44</sup> Jjeya meshijo ba'yanijo esejaya eyami ca'a'ama. Manoje'yo. Ojjaña cuana eseya jamatii ihuije'yo. Eshe o'oya po majje ca ca pea eyami poaje esejaya. Eyajo anicaja jayojja jama poaje'yo. E'e, jjeya esejaya eyami meshijo

eba'ejji ca'a'ama. Jamajjeya e'e jojo nei quijje Eyacuiñajjiya esejaya pea eyami pana caje'yo eyacua, quea ca'a nee eyajo eba'e tiitii'yojji.

<sup>45</sup> Eyacuiñajjiya esohui etehue'yo jama poa ba'a: “Eyacuiñajjiya ebionei dejja Adana bajjani pana ca'ya poa. Eshe po mee ca'ya poa”. Jamaya yahuajo nei nei poa.

Adanaja eyami ca'a'ama poa. Quijje Jesosa Quitohua eseya eshe o'oya po mee cajje esejaya eyami eyacua poaje'yo, pea eyami. Eyajo anicaja jayojja jama poaje'yo quea ca'a nee, ihui'yo ajja.

<sup>46</sup> Eyacuiñajjiya esejaya eyami ca'a'ama ebionei pana ca'ya poa meshijo eba'ejji. Quijje Jesosa Quitohua esejaya eyami eyacua pana caje'yo quea ca'a, quea pame nee pea'ai eyajo eba'e tiitii'yojji.

<sup>47</sup> Eyacuiñajjiya ebionei dejja Adana bajjanija eyami pana ca'ya poa meshi, meshijo eba'ejji. Shequi o'oya majje Jesosa Quitoja eyami eyacua poa, meshi pojjeama. Pea eyami ojaya, de, quea ca'a nee eyajo e'ani tiitii'yojji. <sup>48</sup> Ojjaña cuana meshijo ba'e Adana jayojja. Eyami ca'a'ama.

Meshi oopana. Jesusaja epeejji cuana ca ca o jayojja jama poaje'yo quea pame nee, quea ca'a nee onijje eyajo eba'e tiitii'yojji. Eyami meshi pojjeama poaje. <sup>49</sup> Jjeya meshijo ba'yanijo esejaya eyami ebionei dejjaja eyami jayojja poani, meshi oopana. Quijje eyajo ba'e majje eseya Jesosa Quitoja eyami eyacua jayojjaya poaje'yo, meshi pojjeama.

<sup>50</sup> Epeejji cuana, ishajja'ajjacue ecuea esohui! Ojjaña meshijo ba'eja eyami ca'a'ama, e'ihui'yojji, meshi pojji epo'yojji, Jesosa Quitoja eyami eyacua jayojja pojjeama. Ba'e meemee ajja eyajo

Eyacuiñajjija cuiñajjijo. E'e, jjeya esejaya eyami meshi, de, eshe epojji tiitii pojjeama eyajo. Quijje ca ca eseya eyami eyacuajji ba'e tiitii mee caje'yo eyajo, Eyacuiñajji ojjaña huoojea'yojji poanijo.

<sup>51</sup> Jjeya shajja'ajjacue pea esohui! Yahuajo eseya jiquio esohui ba mee jjima, eyacua, jama ba'a: Beca cuana mano'yo ajja nei nei Jesosa poe o'oya jjimahuajo. Ojjaña joya eshe nequi Jesosa Quito poe o'oyajo, emano'yojji pojjeama; onajaya eyami e'ihui'yojji pojjeama. Jesosa Quitohua ojaya epeeji cuanaja pea eyami panacuaji caje'yo eyacua. <sup>52</sup> E'e, quiijeyejje nei eshe'ana ai mia cajo, Jesosa Quitohua ojaya epeeji eshe nequi cuanaja pea eyami eyacua pana caje'yo. Jiquio ecua cojja capicapiani jayojja jama panacuaji'yomeya acaje. Eshe'ana mia cajo, ojjaña emano'yo cuana shequi mee caje'yo. Eyami eyacua panacuaji caje'yo eba'e tiitii'yojji. Mano o'oya ajja poaje'yo. E'e, ojjaña esejaya eyami eyacua poaje'yo. <sup>53</sup> Jjeya esejaya eyami eba'e tiitii'jji pojjeama. Ca'a'ama. Manojeyo. Chama'yo tii poaje'yo. Jamajjeya poe'yo majje Jesosa Quitohua esejaya eyami eyacua pana caje'yo ese nequi tiitii mee'yojji, emano'yojji pojjeama tii tii. <sup>54</sup> Jjeya jiquio meshijo eseya Jesosa Quitoja epeeji cuana enequi tiitii'jji pojjeama. Quijje ca ca ohuaya eseya nequi tiitii mee caje'yo eyajo. Jjeya meshijo ba'e eseya manojeyo. Quijje ca ca esejaya eyami eyacua mano'yo ajja poaje'yo. Ba'e tiitii'je'yo. E'e, Eyacuiñajjija esohui yahuajo nei nei etehue'yo jayojja jama poaje. Yahuajo jama poa ba'a: “Dejja cuana mano'yo ajja tii tii. Eshe o'oya po tiitii mee caje'yo Eyacuiñajjiya”. <sup>55</sup> Jamaya tehue mee ca poa

yahuajo nei nei pea'ai ba'a:

“Emano'yo cuana emojea'yo jaa tiitii ajja; eshe o'oya po mee caje'yo tii tii. Quijje mano'yo ajja nei nei poaje'yo”.

Jamaya yahuajo nei nei tehue mee ca poa Eyacuiñajjiya.

<sup>56</sup> Mimishi cuana po nequi jjejojo ojjaña cuana mano ca'yani. Jamajjeya ojjaña quea mete nee poani emano'yojji. Moisesija esohui etehue'yojo eseyaya baña ojjaña shajjama' poani. Jamajjeya manoje'yo. <sup>57</sup> Jjeya Eyacuiñajji ejjabihuaqui jama ba'a: —Eyacuiñajji, miya quea pame nee nee. Miyaya ecuanaja Emeshi Mese nei Jesosa Quito huoojeanaje ecuanaja mimishi cuijea'yohua. Jamajjeya ecuana shequi meeje o'oya. Ba'e tiitii meeje'yo eyajo.

<sup>58</sup> Jamajjeya ecuea epeejji cuana, ¡Jesosa Quitoja esohui etehue'yo jayojja jama atiitiicue! ¡Ojaya epeejji quea pame nee po tiitiicue! ¡A'a Jesosa nijje jjapeequi pajea'yojji! ¡Emeshi Mese neiyo Jesusajo chaco tiitiicue! Jjeya ojo chaco chacoanijo, quijshe ohuaya eseya quea huiso sosequia caje'yo eyajo.

## 16

*¡Ejjeshejji chichacue Jesusaja epeejji aema' ba'e meesahuajji!*

<sup>1</sup> Yahuajo pishana miqúanajaya etehuejo eya huohui'ajjanaje bejjo Jesusaja epeejji huasijje, ma Jodea meshijo ba'e yasijje ehoojeajji. Jjeya eyaya miqúanaya saja'aje jama ba'a: Eyaya esohui tehuenaje Jesusaja epeejji cuana huasijje, Janata

meshijo ba'e yasijje. ¡Ma esohui etehue'yo jay-ojja jama acue pea'ai miquianaaya! <sup>2</sup> E'e, ¡bejjo chichacue! E'e, chachacoajo miquianaya sosequia cani cuaa ejjeshejjijo. Jamajjeya ojjaña epojja Eyacuiñajji ojee bihuiajjijo, nomico pojjajo, ¡ejjeshejji chichacue Jesusaja epeejji aema' huasijje ehoojeajji, Jodea meshijo ba'e yasijje! E'e pojjaja' a oe epeejjiya oe pojjji chaco majje oe pojjji quia caje. Pea epeejjiya quea huiso quia caje pojjaja'. ¡Jamaya quea pame quiacue! Jamajjeya eya miquiana que poe jjimahuajo miquea ejjeshejji echicha'yo poaje. <sup>3</sup> ¿Ache dejja cuana pojjaja' ejjeshejji echicha'yo dojo meeje'yo aema huasijje, Jenosanenajo ba'e yasijje? ¡Jashahuabaquicue ache dejja cuana quea pame nee ehoojeajji! Jamajjeya miquiana huasijje poe majje eyaya ma dejja cuana huoojeaje ejjeshejji dojhua. Eyaya ecuea esohui etehue'yo huoojeaje onijje ojjaña esejaya epeejji cuana Jenosanenajo ba'eca ba meejji ma dejja cuana ecue huoojea'yo ejjeshejji quiaa. <sup>4</sup> E'e pojjaja' quijje jashahuabaqui majje eya jama poaje ba'a: —E'e, eya pea'ai Jenosanena huasijje capoquiahua. Jamaya quea pame nee —eya poaje. Jamajjeya ojee poquije.

<sup>5</sup> Quijje eya Masenonia meshi yejjenana sa poani. Yejjenana majje miquiana que poqui sa poani. <sup>6</sup> E'e pojjaja' eya miquiana nijje nequije quea huiso cahui cuanajo; quea hueo poani ba'i pojjja cuanajo eya miquiana nijje anije. Majoya eya ojjaña huapa cuana huasijje poquije o'oya. Miquianaaya eya poqui meesahuaje. Aquiana epoqui meejji quiaje pojjaja'. <sup>7</sup> Jjeya ca ca eya miquiana que poe sa po ajja. E'e, jjeya miquiana



nijje nequi meemee ajja quea huiso cahuijo. Jamajjeya quijje eya poeje miqiana baa. Poe majje miqiana nijje nequije quea cahui huiso. Jamaya eya poaje esejaya Emeshi Mese neiya Jesosaa eya miqiana nijje nequi mee sa acanijo. <sup>8</sup> Jjeya ca ca eya jjashahuabaquiani jiquiojo Epesojo enequijji. E'e, eya jiquiojo tii nequije. Jodio cuana ojjaña bobi que cuanajo nequi chicha majje, bobi apoa po majje pea'ai ojjaña quea bihui nee ojee ijja'ijjaaje. Maya eyaya ishoaña. <sup>9</sup> E'e, jiquiojo eyaya quea huiso cuana Eyacuiñajjija esohui huohuaña. Quea huiso nee neeya shajja'ajja cani. Jamatii quea huiso eshahuaja epeejiya eya Jesosa Quitojo mimi pajea mee'yo sa acani cuaa.

<sup>10</sup> E'e pojja'a Timoteo miqiana que poeje'yo. ¡Poe'yajo oya jaahuanacue, quea bihui nee po meecue! Oya e jayojja jama poani; esejaya Emeshi Mese nei Jesosajo chaco cani. <sup>11</sup> Oya etii pishana. ¡Jamatii ojjaña miqianaaya oya shajja'ajjacue! ¡A'a ojo miamiajji! ¡Pea huasijje poqui meesahuacue quea bihui nee! Jamajjeya oya poeje o'oya e que. Eyaya oya ishoa'ajja anije Jesosaja pea epeeji cuana nijje.

<sup>12</sup> Yahuaajo eya Jesosaja epeeji Apono bajjani nijje miminaje jama ba'a: —Apono, ¿ache shono acuae miya poquije Conito huasijje esejaya epeeji cuana baa? ¡Jesosaja pea epeeji cuana nijje oe poquicue jocuama! —eya poanaje.

Jjeya oya, Apono poqui sa po ajja quea huiso chachacoanijo. Quijje apoa po majje oya poquije miqiana baa.

*Pea esohui quepe nei Etepanajo*

13 Ecuea epeeji cuana, ¡quea ja'a nee jjashahuabaqui tiitiicue! Peaa miya dasia ca chana'. ¡Jesosa nijje jjapeequianijo Eyacuiñajija esohui jayojja jama po tiitiicue quea pame nee! ¡A'a Jesosaja epeeji quea mete pojji! ¡Ojaya epeeji quea ca'a nee, quea pame nee pocue! 14 ¡Ojjaña quea jea nee acue! ¡Quea bei nee nee ba'ecue ona nijje!

15 ¡Epeeji cuana, shajja'ajjacue mo! Miquiana-jaya eba Jesosaja epeeji quea pame nee Etepana bajjani. Ojaya huapa pojjeama cuana miquiana-jaya eba pea'ai, Jesosaja ebionei epeeji cuana Acaya meshijo poanaje. Jesosaja pea epeeji cuana jaahuana tiitii cani quea pame nee, Etepanaa.

16 Jamajjeya ¡onijje jjapeequicue! ¡Quea pame poanijo, oya shajja'ajjacue! ¡Pea cuaa Etepana jayojja jama quea pame nee Jesosajo chaco cani shajja'ajjacue pea'ai!

17 Ojjaña miquianaya poe ajja e baa, enijje jjapeequi'yohua. Jamatii miquianajaya epeeji cuana Etepana bajjani, Potonato pea'ai, Acaico pea'ai poeyanaje e chaco sahuaa. Jamaya quea pame nee. 18 Miquiana quea bihui nee po mee canaje jayojjaya jama ohuaya eya quea bihui nee po mee cani. Quea pame nee poanijo, ¡oya cuana cashajja'ajja cahua ojjaña!

### *Esohui quiijjeyeje nei tehue'yo*

19 Jesosaja epeeji cuana Asia mishijo ba'e miquianajo jjashahuabaquiani. Jamajjeya eya huohui'ajja mee cani jama ba'a: —¿Achajja acuae nequiana ani so'o? —onajaya ebajji.

Jesosaja epeeji Aquinaa ojaya ehuanase Pisina nijjeya, ojjaña Jesosaja epeeji cuana Aquinaja equijo ojee dobiqiani Jesosaja esohui baa pea'aiya miquiana huohui'ajja cani jama ba'a: —¿Achajja acuae nequiana ani so'o?

<sup>20</sup> Ojjaña Jesosaja epeeji cuana jiquiojo ba'eya miquianaya huohui'ajja cani jamaya pea'ai.

Ojjaña Jesosaja epeeji cuana esejaya quea jea neejo, ¡quea bihui nee mimicue ojjaña cuana nijje!

<sup>21</sup> Eya bajjani Pabo. Miquiana quea bihui nee epojji eyaya eyaye neiya jiquio esohui tehueaña miquiana huasijje jama ba'a: <sup>22</sup> —¡Ojjaña joya Emeshi Mese nei Jesosa Quito nijje e'e jojo nei jjapeequi ajja Eyacuiñajjiya quea nee nee capo mee cahua! ¡Esejaya Emeshi Mese nei Jesosa Quito capoe o'oyahua jjeya nei!

<sup>23</sup> ¡Esejaya Emeshi Mese nei Jesosa Quitohua miquianaya cajaahuana cahua quea pame nee!

<sup>24</sup> Eseyá Jesosaja epeeji cuana poanijo miquianaya ecuea quea jea nee nee poani, ojjaña. Mahuiso. Eyaya, Pabohua jiquio esohui tehuejeyonaje. Apoa.

**Eyacuiñajjija Esohui**  
**New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

---

PDF generated using Haiola and XeLaTeX on 11 Nov 2022 from source files  
dated 29 Jan 2022

88838088-e20d-51ca-8c91-69194f5ae678